



番易仲公李先生文集卷之十二

雜著

御書贊

元統元年秋 皇帝御明仁殿特書閑閑看雲四大字賜玄教  
大宗師特進上卿臣吳全節閑閑蓋其所自號也看雲又其嘗  
築宮於雲錦山曰崇文復構樓一區以爲他年佚老者也於是  
模刻諸梓飾以金碧三年春命其猶子平陽路太原府經歷臣  
蒙賈歸而揭之先是集賢院奏四月十七日爲 天壽節故事  
前期差使降香龍虎山雲錦山等處今遣法師臣李紹老紹老  
與蒙水陸公私異途且離京師月日先後相懸及四月丙子不  
期而同至又自正月至於四月陰雨淒風人不敢釋纜是日天  
氣開朗街衢爽乾明日霽色絢麗南風微和大宗師弟子崇文  
宮提點臣于有興有事于宮庭陳金鐘玉磬列天神地祇之象



爲位二百有四十酌以酒茗薦以菓蔬早午晚三時行禮用樂效雲中海上之音夜漏未盡二鼓卒事急雨復作簷溜四瀉成歎異以爲天時人事之偶有如是耶此固出于 皇上聖明凡所施爲昭合造化亦由大宗師愛 君尊國純誠之所致也又明日置酒大會賓客布衣臣李某言於衆曰夫書心畫也自鳥跡科斗廢而爲篆爲隸爲楷晉唐以來明君良臣非無善書然以清麗稱者或近於媚以飄逸名者或流於放今 皇上春秋鼎盛左右有老成之輔朝昏無燕昵之私聖心之安神氣之和蓋溢于筆墨之外不但度越前代有非專門自首所能企及實宗廟社稷無窮之休也某聞古之君子有不必親相與言者以禮樂相示而已況於 皇上生民父母其勢甚遠其義甚親奎畫超然同于對越感諸其心而發諸其口者不能自己雖在布衣法無其禁於是皆顧懽喜不以臣言爲非重稽首而爲之贊

曰 皇帝踐阼尚于文德偉哉天遊先此翰墨惟大宗師實方外臣應時順事豈必隱淪故山之西有字明靜異其扁揭昭乃脩省萬象森羅胡看於雲顧吾閑閑法其氤氳孰爲彰之而徹天聽燕清持書龍相鳳並丙子之旦霽陰劃開匪人而天水陸同來繫大宗師職在祠祭簡于君心寵錫爾異股肱忠貞其恩若何昨土分器曰維蕃多成周隆平以爲大賚我皇之仁禮節踰邁煥乎天章誰其能名微臣何有四海頌聲

### 趙叟

趙叟制之善奕而游焉者也吾里有余姓者與之角而弱當歸罰而曰今無有叟唯唯而已詰朝歸之如約他日買金且輸官既而遺焉叟獲而返之人咸謂叟癡日挈挈瓊瑣得其金宜可歸休而暫安焉叟曰不然而情我我可以不情之乎子李子聞而義之曰今夫以勢爲麾剝權迫以便倭傾側取向合以巧筭

行刻削以智術變詐畔契券諸取利者無所不至至於同室骨肉之親亦往往有不暇顧人遺金而巳有之不猶愈於此乎孔子曰至誠而不動者未之有也余誠叟之爲動矣雖然苟非其人簞食豆羹見於色吾用是知叟之才之美也至有平時好爲高談闊論及一見利則引吭注目尾帖而耳豎若狗之於骨也悲夫且行而鬻伎者紛且沓也孰謂比畧而人而無賢乎惜哉吾文不足以託遠焉耳

或問

或問俗可從乎曰無枉無窒吾從諸否則確或人感然曰吾見確確者衆人之所指議也奚其確曰求不指議於賢哲也衆人其如我何世嘗非采薇者矣而仲尼不棄也世嘗媚鄉原者矣而仲尼賊之也曰有是哉釋老之疑疑也不其軋乎曰天地果可無乎吾與若皆得而知也日月果可無乎吾與若皆得而知

也奚其軋沂流以風則順者爲逆矣吾見佳植之或莠也吾見美實之或蠹也然則終風乎曰不宿治以吏治乎曰格之而已尔如化何靈庭冥冥白晝爲慄矣而莫盜取其器死不勝得也如化何

釋傲

客有難余者曰外人皆稱子傲盭盭尔几几尔吾聞之書曰無傲從康詩曰彼交匪傲若是者何如也余曰居吾語汝今夫王公貴人千金之子操黜陟之柄持臠與之權人孰不榮其榮富其富仰而望之企而慕之逢之欲其親悅之欲其容故或盈而傲中人所不免也亦有儒家者流窮詩書六藝涉古今上下弄筆墨闊視大叫謂人之莫己若者故或盈而傲中人所不免也吾試舉斯二者子以爲吾果有一乎凡吾之所以彼此名者果何由哉昔魯人有弁冕於越者越人群聚而怪笑之嗚呼豈魯

人者誠足怪矣哉見其所未嘗見也客曰嗟乎子蓋欲異夫人也夫立異者謗之所趨而尤之所必歸也而奚可爲也且子獨不聞夫易之隨乎剛來而不柔動而說隨隨時之義大矣哉不然吾見子之窮且老也余曰子過矣子過矣吾聞之君子者尚其志也居其命而不逾也仰焉則日月星漢昭乎天俯焉則山岳河海亘乎地夫何慊乎哉其於外也可而可尔不而不尔富貴而富貴尔貧賤而貧賤尔生而生尔死而死尔何至於於延延靡靡遷遷爲優倡皂隸之態以求媚夫兒女子乎仲尼不云富貴如可求雖執鞭之役吾亦爲之如不可求從吾所好客於是色然謝曰他日吾見子之克尔今而後知子之志矣是可與立也譽之而不加長毀之而不加沮利不利疚不疚而吾又何難焉而吾又何難焉客退作釋傲

辨訛

明越杭婺金陵宣城廣德皆大饑人相食有司發而竭弗甦旁郡富於粟者誘而致之或美價焉或施焉而期之以爵而相傳以爲天實厲之而欲全之者是違天也違天必有大咎某州某姓氏者夢神人謂之如是李存聞而嘆之曰東南之俗若是其誣也爲是說者不以忍乎哉昧者固易以信然而鄙夫則遂以託焉尔也而有司或以是怠焉尔也夫民命於天而生者也生而厲之則如勿生而已矣天豈其然今夫孺子之蹈水火也有不避焦濡而救之得未聞見怒於孺子之父母也然而世之鄙昧者恒千百而賢智者惑不能以一二鄙昧者恒遇達以有餘而賢智者恒困頓或不能以自存是故怪誕之易倡而卓卓之論難樹也嗚呼天果不欲全之耶則禮者不可信而神者誠難憑矣天果欲全之耶而胡爲乎賢知之鮮屑也天乎天乎孰有能問之者

襟說

李存曰風詩之首義也所以明善癉惡者也故聖人尚焉無所於風何詩為三百篇勿論也下讀屈原離騷令人感憤眷顧弗忍相薄遺陶潛詩令人脩脩哉志貧賤李白詩蕩蕩乎廣人志輕世欲杜甫詩令人渾然端且厚慨然有忠節舍是吾未見其多益於人也河東張生翦嘗為余言翦居錢塘人為俳優日聚觀至數百人或千人其傳為慈孝為節義事者長幼無不慷慨長嘆至流涕或慟哭不能終觀有是哉感於人心非小補豈盡鄙事也至其為離合淫哀謔靡真賊夫人之子不足道哉不足道哉

編莊子序義

古莊周者彼何人者耶其遣言措意闕乎莫之能聽希乎莫之能視嗚呼斯編也是其滓濁也夫或曰欲凜其滓先涉其涖欲

溪其澗先源其濁今夫日中為市粲然而金珠也斐然而文綉也赧然而丹漆也敖然而車輿也窪然而甑釜也翕然而畚也屑然而屨也駭然而帚也錯然而薪樵也趨而質者時其用之適也未有一日而槩焉者也是故未後而先其行顛顛未小而大其行邁邁未下而高其視高斯編也可以視二三子也不可以他人者也使或他人見之必蹙然傷莊周之非遭而不賈也雖然二三子之於學也無乃力乎力乎而不已吾不知其止嗚呼又惡知今之蹙然傷者不為後之鞮然以喜者乎

顯孝錄序

饒娥饒州樂平人古今天下皆知其為孝也見唐柳子厚文寶應間父勤醉漁風卒起不能舟溺死娥年十四走哭水上耳鼻流血氣盡伏死國朝邑人許道傳獨得大曆四年邑令魏仲光孝女碣謂勤涉河采薪為水物所斃不言娥死樂平圖經謂娥

訖父喪終身不嫁乾符間仲光族孫愔為令時所立碣賊火焚壞因再立碣亦言終身不嫁大曆去寶應甚近乾符雖遠祖孫皆令其土三年與士民接詢訪豈不覆乎厚本北人雖謫守江南蓋得之傳聞而新唐書因之二魏文不顯行故無知者今許子集前後名楷紳詩文建中旌表始末共為一編題曰顯孝錄其友魯志敏持以示余謂將鉞諸接余曰許子之心豈不以娥憤父死而一時與俱固難已而仁勇者能之終身不嫁則是終身憤父之死先王之制喪禮也哀有隆殺一時之死孰難於終身之哀乎終身之哀則是終身之不燕孟子曰大孝終身慕父母是以不可以無辦正正辛卯八月朔日書

番禺仲公李先生文集卷之十二

番禺仲公李先生文集卷之十二

記

胡氏新樓記

邑人胡君茂之之居適依於層林深樾茂之為縣曹未四十棄去即其居之西而樓焉上下以櫺通朗無蔽茂之日偃息是間而命其子式從余游余他日過之主人延登陳書畫行豆觴意歡如也酒半起酌而言曰吾疇昔胥也自一日而有斯樓也公門不一迹也公事不一耳也人孰能胥我哉又酌而言曰胥乎吾見有如穿也者而人蔑之出也吾見有如來也者而人蔑之絜也然則奈子孫何又酌而言曰吾子式也獲與先生游也願得先生文辭華斯樓也幸先生無讓也余曰善哉君可謂振焉而不矜焉者矣後之人其庶有興矣乎疇之酒而為之歌曰迷而知也天之裨也一日而啼鬼神未之窺也家之羸也心之肥

也昧途而追終不可遲也遂盡醉而罷明日書之以為胡氏新樓記

### 金谿縣烈女廟記

撫州金谿危素以書來言曰金谿烈女廟者祀葛氏二女也初金谿產銀有司歲采有場相傳唐寶曆間葛祐為場曹適礦盡輸不數榜掠罄楚殆死祐二女痛無以贖其父躍入冶中自燒死須之各化為銀由是祐得免監場黃康以聞于朝特為罷金谿銀場邑人異其孝感祀于里之僧舍國朝大德間縣丞濟南吳瑾別為屋以祀延祐間縣尹河東李有撤而新之是祠也既未列于典祀復無以紀其本末甚可懼也李其仰天嘆曰堯舜三代遠矣子而有其身是無親也臣而有其家是無君也非一朝一夕之故也今聞夫二女之風者孰謂人之本心可得而盡泯哉夫女子長於閨門之中其事則織紵組紃其德則婉婉聰

從未必如學士大夫能時取經史而誦習之又未必有良師友旦旦而啓助之又未必出於要譽鄉黨而為之且平居以意度為窟宅以辯析為日用者將不信以為果然有也昔饒娥哭血求父而死蛟龍郭巨并食埋兒而遇黃金孟宗泣竹而筍生王祥剖冰而鯉出是皆用何道也嗟呼至誠之心其亦有不可測之神焉如此哉是心也天不能以加高地不能以加厚人人有之而或弗自知也知之而或弗自行也今也崇廟祀俾弗隳紀事實俾弗訛將以子人之子而臣人之臣也窮天下之吉凶禍福孰大於是

### 天台靜玄觀記

天台去地二十里曰咸唐宋平章賈似道嘗營別業焉既以與道士丁某盧某而額之曰靜玄觀且以田四百畝食之其後似道竄逐以死財用土田悉沒入而咸唐以靜玄免國初僧搃統

揚某寵貴有僧某者誣獻之強改為寺其徒閻公訟之中書復為觀元貞間似道從子某者乞貸不得憾之言有司咸唐之田宜隨所沒者於是財府征之閻之徒周元澤狀白立教大宗師張公公復上之中書下戶部推驗如狀還之未幾屋燬於冠元澤改築今所凡為殿為堂為廡為門為庖為厩為廐為客館揔若平楹人謂其制弘於舊也余聞而竊感焉夫賈氏執季宋之柄廓乎其公而坦乎其心猶或不足以振其衰持其顛願乃肆其私邪作威於國家訖錄之際殺其身而藉其家亦豈不辜也哉然所以成唐者徒以託之黃冠羽服得以不沒雖更代而有勢力者卒莫之奪既又燬且復構又豈非事之偶似於善付之獨得其人乎哉使當時其心術一出於義能者進之不庸者退之功有賞而罪有誅天之曆數縱有所歸身何至於戮家何至於沒乎設有非人情之所料萬世之公亦烏可泯泯也沒而

有知寧不為咸唐一自悲乎矧聞天台之山水甲東南而靜玄之傍又為龍湫者數四靈物之所栖息宜其序守而不失歟余因記其改築而并及乎賈氏亦世鑑之一端也

充齋記

泰定三年冬上饒祝弘道來言曰弘道嘗獲納謁于播州宣慰楊公之門公不以弘道為不才按而置之幕下惟公當朝庭方面之寄固未必以進一士自德而士苟有志効用于時者亦不敢以此私德於公然請言公之為人及其所以治播者公朝而起盥櫛已禮于祖考之廟退而起居太夫人又退而與僚屬論政事又退而讌於其所扁之齋曰充讀書鳴琴其間或與士黨相唱和四方之士歸之者亦無不薦進勞來饒遺不賦耕不征商故其民雖多推悍然皆嬉嬉恬恬城中夜戶闔而不遂行旅晝夜不絕至或止宿荒茅枯蒿間亦無敢奪攘歌鼓以樂生棺

柳以送死殆與中州同也李某曰僕聞之楊公將種也世守於播播之為州地方千餘里南臨牂柯北通巴蜀勢若可以武服而不可以文令雖當四海無虞之日苟放歌擊鞠以養其氣射能搏虎以便其習一有警發則被堅執銳擗然為士卒先亦不失為將家能子孫然歷觀古今天下雄藩巨鎮建功立業於一時者非無其人往往任智而不任德知勇而不知義殘忍暴縱以歿其身者有矣况能及子孫乎今楊氏之於播綿歷累世及公之身而又德雅自將用能致朝廷寵畀而安而使其民愛戴如父母斯不謂之擴而充之能若孟氏之言者乎夫如是則燕於其齋求所以承先公而利後嗣與國家相為以長者有不待他取於義而得矣弘道曰善子之言非獨譽公而已請書之以獻或因可記其齋云

戴溪菴記

上饒薛君立卿既葬其親于臨州白馬山之陽復構屋數十楹于墓道之南擇材質良惟時閑休工丁共力旬月告就邃殿中以為神栖主人僕從各有居處內庖外廡靡不飭備黜堊鮮辨垣墻周固俾鄉之愿而有恒者居守之且為之田以為歲時展省休止之所旁有溪流相傳戴氏昔居其上而溪遂以姓君因扁曰戴溪之庵而來微言為之記嗟乎吾見貴富人墓之多矣鑿山壘石不遺餘力曾未幾時而斧斤已及其木者有焉無及植其身於平日者或不在于於德而導其後之人者有不出於禮歟夫上饒之薛也顯於唐盛於宋名人巨公前後相望君今雖為黃老清靜之言以曹于時而又能憫憫焉於送終之際如此其盛然則詩書之道終長而君子之澤未易竭也他日之來者其必相與言曰塋域之間得無有樵牧之跡者乎甃砌缺裂得無有不愧於墓中之人者乎墓而屋屋而田其亦有克念經始

而續圖於永久者乎是蓋君之望也若夫祠墓之俗所由來久矣雖不著於禮經然豈知神之所饗於彼乎於此乎亦孝子仁人自盡其心焉耳

上塔寺修造捨田附祠堂記

臨川之東鄉有寺曰上塔屋老甚且無碑碣可考蓋不知其始何時寺之僧永茂者忽言於衆曰嘻惡可以坐視其圯於是自殿及門取瓦甃之斷裂而椽桶之朽拆者盡易之未幾新鍾樓又未幾墁垣牆砌道路時則有永芸者亦干財於富室而葺經截焉為之會其費則從而飲助之既復曰合吾寺且三百指饘粥將不給柰何披其私畝而公之戚然自念曰吾故儒家子也而遭於不造寄跡釋氏之門者五十餘年矣今先人之他子孫無子遺者而吾亦老且憊焉猶有鬼神則將安所歸乎乃祠其父母於堂之東序又披餘畝以食衆而資其春秋薦獻焉他日

命其徒正印來請述其始末余曰久哉世俗之偷也若尔師者亦可謂不私其贏不忘其本矣愆於義而病焉尊所聞而行焉固有可尚而又有可悲者也師姓李氏世為臨川人父諱某字叔陽登宋某年進士第嘗教授福王宮云

芝山文惠觀記

芝山文惠觀者因重修長沙吳文惠王之廟而作也初王廟郡治西北歲久而圯延祐間三山王君都中來為郡從而新之且曰是宜有朝夕司管鑰者不然則圯毀隨之矣然有其人居之無下則繫無其人責之民則不專皆非所以昭事神明之道也於是闢廟西隙地一畝創屋數十楹而扁之曰芝山道院謀名羽流居之且以書抵京師告立教大宗師吳公曰廟在公父母之邦而神文公之先世也公得無情哉於是大宗師欣然檄方君志遠主之未幾王公以代去大宗師復檄立妙朱君某兼領

之朱君捐已帑增西廡且曰饒氏之德王公也而又感激夫大宗師之拳拳於是祠也像二公而奉之又別為方丈若干楹凡前工之未卒者皆完之又入已田二百畝久之志遠亦入田二百畝某年間志遠被璽書提舉立妙觀兼住持芝山道院未幾大宗師復命子某主領之且上其事集賢得改今額謂之文惠者因王封也余承乏以來每徬徨嘆曰昔秦人刀鋸鼎鑊以待天下而當今獨得江湖民心秦亡宜其裂地而歿而有廟雖百世不可廢也今也得王公經營謀度於其始得大宗師遴擇獎勸於其中觀焉以輔其廟田焉以飽其人宜與土靈民心相為久長者也余雖不敏敢不畜所以不朽於其終哉謹叙其始末刻諸石庶幾來者知所考云

兩峯樓記

兩峯樓者樂平劉明子文子讀書所也初上饒祀君蕃遠來長

餘平之鄉校曰南溪子他日過之祝君出其徒十數輩揖余且曰若輩皆有意於文字者願為我命題少試之於是得明子為選首予因知其才久之祝君以代去明年以子為其師之友而業不可以少荒也神詩過余因請益焉又以之明子以其弟文子請曰僕之父樂教者也即君之傍為樓若干楹嘗客陳先生易東其上先生以兩峯二字扁之兩峯者何曰昔蘇老嘗記木假山者三中以自況而傍以况子也三而兩者何舉其旁也舉其旁者何曰吾為若慕二蘇也慕二蘇者何曰比之若吾友也友之則誰不美擬之今先生往矣而言猶在耳願吾子少述焉古之為居者或以脫障隘而通高明或以出蒸馱而乘爽潔其辱於歌舞酣歡其狃於觀覽而偷於裕暇者君子無所取焉吾嘗謂明子之詩其氣完以舒其思藻以發無乃有得於父師之誘而居處之助也乎不然何其尚慕於蘇而不以自間也是為

記

筠溪堂記

余干之長田多大山而柴氏世居之往往鑿山而屋層見疊出如樓觀然至不可基乃止而傅翁甫之築適在其左麓前有溪流旁復多竹翁嘗病其蕃且隘也無以自休息安賓客復臨溪而構焉脩其前楹皆立水中薄地而板虛實半之四面為窓牖夏多南風冬則不塞向而溫而自扁曰筠溪之堂以其有水與竹合二美而名之也嘗謂士君子之於葺且息也亦必有勝焉以助之是故雖古之人猶亟稱於水而樂於山余雖與翁未之識也而其婿嘗從吾同舍上饒祝君蕃遠遊氣直而尚古每為余道其婦翁年纔五十而家之務悉諉諸子時自燕坐堂中其言有曰夫水泓然而為深皎然而為淺者玩之皆足以洗濯乎吾心而竹也動而扶踈立而靜直又皆足以休吾之体而息吾

之影吾朝於斯夕於斯則所謂內馳而外膠者將不出戶庭而自得夫師與友之道者耶柴氏蓋數百年以詩書名家前代屢有顯者翁雖未嘗干祿于時而陳卿多數其忠厚好義故余樂為之記而不敢辭也

番禺仲公李先生文集卷之十四

記類

群木軒記

魏亭劉生震闢一室讀書其間室之外有松有楮有樟有楓有  
檉皆百本高者數尋大者十圍其師顯民揚君題之曰群木軒  
他日來徵余記余曰人患乎赤日之烈也而子之軒用以陰人  
患夫居處之暴露也而子之軒用以深風之秋也而子之軒先  
涼露之夕也而子之軒以潤子之愛於群木也其以是而已乎  
曰然曰子徒知群木之可愛而未知群木之可師也夫木之適  
於用者松為上楮次之樟次之楓檉為下或貴而梁棟巧而雕  
斲華而藻繪又或賤而新樵棄而灰炭遇虫而冗得濕而腐木  
亦未始樂於貴而悲於賤也貴者亦未始自賢而賤者亦未始  
自歎也人咸賴其用而木亦未始得焉用棄其宜而木亦未始

怨焉曰木無知木無情吾子之為是言也殆亦未極於理乎曰夫木萌於春蕃於夏悴於秋槁於冬亦胡為而然哉是故木非木也人也天也知木則知人矣知人則知天矣然則群木非吾師乎作群木軒記

清明閣記

夫木之居處也不皆在於安其身亦必求以養其德是故病於湫隘者宜即夫亢爽以自開泊於躑躅者嘗擇夫靜虛以自遣撫之金谿族大而蕃莫若火原之余有君儀父者獨依其里之東山以屋子曰琇玉復構閣於旁而詩書賓客焉閣之四面皆高山大林前為深池池之上佳花美木而自題其楹曰清明蓋取諸戴記清明在躬之義也他日徵言於僕以記之僕曰遠矣琇玉之名其閣哉然則果名乎果實乎名則僕也無所於言寔則敢請其所以必也默望收視不與外物膠而謂之清明則或

類於禪宗者矣必也玩弄雲月侶鶴鶴友鹿麋放浪形骸之外而謂之清明則又將流為黃冠者矣琇玉有父母有兄弟有妻子有僕妾外有公上之應酬內有私家之經紀其必擾擾焉懂懂焉於日用之間亦惡乎而清明哉雖然吾嘗聞之上達之士雖視而未始視也雖聽而未始聽也至於言動莫不皆然事物之來如水之止如雲之行無禍福利害得失老少死生窮達之分夫如是斯謂之清明矣故曰心外而求心則不足以得夫心事外而求事亦不足謂之事矣僕之聞斯言也久而有愧於斯言也亦久矣今秀玉之為名也殆亦有志於此者困其徵言樂為之道而并識夫僕之媿也秀玉之子曰奎世富足而好禮樂云

重修崇真閣記

崇真閣者撫州金谿縣后居里之后土祠也宋初吾何氏某世祖真外府君由邵武徙居于是有后居之名相傳真外避亂隨

兵后車而至事遠莫可考當其時斯里蓋榛莽也歷數世生齒  
既盛於是始有聚居若市井然建炎間從祖三十六府君始自  
維揚蕃釐祠迎后土之神歸而祠之祠在市之南凡水旱疾疫  
禱輒應皇元大德初祠宇凋零祀事幾息我先人南唐府君復  
因舊基而新之中為正殿傍設兩廡外為門門之外豎靈石像  
日月左右列之後為閣閣可坐四五十人聖其壁畫星斗像故  
號為七星閣館學道之士以洒掃之歲三月十八日設醮祭遠  
近至者甚眾率為常由是后居之里往往物不疵厲而民無札  
瘡我先人即世祠事日以廢施棟宇日以傾歆竊惟后土雖在  
國之祀典而是祠者乃上世之所初建厥廟宇又先人之所改  
作豈宜廢墜而弗顧至元戊寅出統鈔若干買其基於族黨施  
而公之可永為后居不廢之祀既又得族之樂善者某人等議  
同而力協由是規模粗復其舊既畢眾咸謂是祠之完一足以

安神祇次足以慰祖考宜書于石予謂區區之是舉也政恐不  
足以紹述先志又奚以刻石為然尚慮吾之宗屬里之居人猶  
以斯廟為吾家之私業視其廢興忽焉不加喜戚於其心也是  
宜勒諸石以告來者自今以往苟有頽毀人得而葺之廢斯祠  
之不朽云耳

### 葉真人祠堂記

友人葉行叔曰里之王宗嶺舊有葉君祠君吾祖也以能致風  
雲雷雨役鬼物享唐玄宗拜鴻盧卿封越國公後為神宗宗寧  
間錫號真君歲久祠且圯偕從弟克承改築于青山之陽為屋  
若干楹中祠越國夫人兩室有門有廡嘗聚族謀曰吾葉氏得  
姓尚矣其散在四方者不可考近自晉蒼梧太守六世而為越  
國又五世而為唐信州雄石鎮軍民鎮遏使由雄石至于今凡  
十五世日析而日遠矣縱吾與若輩不敢忽而忘其若他日何

吾欲自高曾而下主而列于東室高曾而上溯而至於蒼梧列諸西室歲正月三日集祭越國以及於東室其西室祀而不祭昭不忘也可乎衆欣然曰諾吾且入田以贍懼其父而陳也敢請記之余曰祠祭古有法焉可苟曰越國江閩間通祀之顧吾子孫乃不得祠耶祠越國水旱也疾癘也蒼梧碓石以下何為曰祠吾子孫作也且昔之鎮今潰溪縣是也碓石曰家焉是為貴溪之初祖然則蒼梧于越國先也何以名室曰祠為越國作也東西室何以祭不祭曰遠近也高曾而此為食寢則發歛曰從越國於歲始也余於是不能詰從而謝曰子之宗誠賢子孫也余小人不足以及此世固有謾不省其所自出者亦有視同氣如途人者又有崇私積怨操同室之戈者今子之為不唯與夫尊祖敬宗之心深足以厲爾後之人不唯厲爾後之人亦足以厲夫世之薄且偷者傳曰禮維先王未之有而可以義起者

非此之謂歟行林名必勉克承名繼清為老子注龍虎山中嘗被臺書賜號全德純素通玄法師云

摘隱亭記

信戈陽之南有山曰寶峯廣袤几百里曰雲吐吞瀑泉怒流嘉樹豐中陰翳蔚然與雷山龜阜相峙立俞氏世居其間若隱若仕皆高蹈絕俗以明經振其家聲比：而是弱冠時嘗願一遊達今老矣如有所逋負然至正九年冬俞某以書謂余曰昔吾母年高嗜摘嘗治圃植百本為奉母也親沒而不忍惠其所好因引泉為池作亭其上存乎吾所思也暇日登臨或琴而茶或觴而吟以燕息賓客為清碧杜公扁曰摘隱亭若公咸詠歌之敢蘄吾子一言以為記使後之子孫視斯亭以為勸予曰記者記也予未即斯亭觀其所制及其所有將為記諸雖然物不自美因人而彰况篤以孝思東爨之心不違其親而好事為此亭

得已于言乎故夫思之不可以不慎不然視猶擬封君之富視  
亭為娛客之計又安知存乎所思也必曰吾視也何以視吾聽  
也何以聽吾言動也何以言動朝於斯夕于斯飲食必于斯造  
必于斯顛沛必於斯如是而思而不忘其初則世之慕其親  
者孰得而過之乎故於橋隱亭記之請重有感焉且乎後之賢  
者有所承式其別號行焉清重溫文鄉稱善士其子文明春秋  
尚書禮厥後綿之繹由孝友而致功名者非吾之子孫而誰  
歟

五一堂記

五一堂者郊山鑄煉師休焉修焉之所者也劉之言曰人于茲  
世也者其無乃累乎馳而外者其無乃累乎今夫狼者鷲者  
蛇者蠱者采焉而踞者叫呼而撼頓者紛且錯也吾故于斯  
焉託也生於斯其為條也乎死於斯其為溝也乎是故物靜而

年事靜而天吾於斯見之為見一焉因以名夫子記諸予曰噫  
子之為此言也子何為嚮之而無以遂其托也是記

稼圃堂記

稼圃堂者餘于鍾式時乃曾大父祥叔氏作於宋紹定間以自  
燕者也歲久而圯其父直翁父更築焉又且圯時乃葺之以完  
而請特書于季士虞公而揭之楹它日以書來徵記於余且曰  
吾聞諸先子曾大父狀貌魁然遇童稚若大賓然其視聽靜而  
端雖獨居必正衣冠今堂也粗不墜敢告一言以詔夫後余嘗  
造時萬賓客之在坐者濟濟子弟之在列者彬彬琴瑟備此而  
圖書滿前櫺有佳卉而檻有奇石也將其場逼冬且畫積粟如  
墉布穢而落其實擊朴之聲自雞鳴至于夜分固意其曾祖才  
質之美若可出用於當世者而猶留情於稼圃何其自紹定至  
于今百有餘年矣自其曾祖至於曾孫亦既四世矣世固有父

見諄乎耳而面命而其子弟若弗聞也者能從于其生而背畔於其死者蓋已寡矣今鍾氏之家大於昔者倍子孫衆多於昔者亦倍而於斯堂也更築之葺之求特書之且記之唯恐一日而失前人名堂之意亦豈非教行於家事不偏廢弥久而弥篤弥衍而弥不墮者如此夫稽之於詩實方實苞實堅實好麻麥懜：瓜瓞喙：者后稷之稼圃也而七月之作又出于聖人之手率多農圃衣食之言列之於經習之于天下後世用于朝廷宗廟其誰敢鄙之由是觀之一自天子至于庶人孰不以是為之本歟貽厥後謀以燕翼鍾氏之曾祖有焉是為記

### 散木亭記

龍馬山中道士周君微之築亭於其後圃繚以崇垣環以明牕古書名畫壘爵鼎爐之屬無所不設將以自宴且以宴賓客也而每有取於莊周樵社之喻之言而扁之曰散木他日以書來

命余記余曰莊氏殆亦欲行其所無事而惡夫鑿者耳不得其旨者徒取其糟粕粗糠由是或恣睢放縱壞爛而無所檢束似高而不中似激而非和者之所為也然吾又嘗謂夫衆人之視木梁棟若可貴而薪樵若可賤也然則梁棟吾所以避燥濕寒暑者薪樵吾日用衣食之所資也未必梁棟可有而薪樵可無也亦何必梁棟之貴而薪樵之賤乎然則孰謂之散孰謂之不散故曰智慧之流是非如戈矛勿事分別則亦無所議說此又莊氏言外之旨也余嘗及識微之於其山中其神峻以清其氣溪以私其於三教之書無所不覽又嘗從師於窮崖絕壑之端以講夫道德性命之微而復能以其餘力賦詩鼓琴為大小二篆書不泊：于俗下不踴：于方外故余特求夫莊氏之所未發者而為之記云

### 鍾氏慕堂記

余于鍾式時方葬父母於習春鄉之清原他日過余而言曰式年十有三而喪父二十有三而喪母碩疾病不能竭其誠葬埋不能究其禮祭祀不能必其享今三十有七矣駸乎其哀維嘗築室于塋域之倚時一洒掃所以備食息風雨者舍是亦安所用吾情乎余欬曰俗之不厚久矣固有朝死其親而夕忘者少隆焉旬朔耳加隆焉則亦期月而已矣古人云孝子終身慕父母盡扁之曰慕堂然則子亦無徒事于孺慕為也聖門之論孝隨其等哀而發其旨義且子以為親果死乎其精神蓋無不在也子其止尔心敬尔身隆尔師友教尔子孫守尔田庐睦尔鄉黨或出而從事於當世毋慳厥職而敗乃事夫如是可弗辱可以全歸吾知子之親必將欣然而來享亦豈必春秋朝夕歆歆恠恠一物一念而謂之慕乎時方拜曰善乎吾子之言也式雖篤下敢不勉強乎且請書而刻諸堂之右

復琴記

龍虎山中上官鍊師九齡嘗得一琴於蜀人王氏其陰之刻曰秋声有既明者為余言其伯父郢州通判伯堅所收也初穎州以善琴客宋史丞相府會理宗召天下能琴者十人入禁中教宮人琴郢州寶愛之寢處必與俱沒而歸於鍊師：之寶愛猶郢州也其師立教大宗師吳公父在朝適貴人有好琴者聞秋声從大宗師索焉秋声在江南取未至而先以他琴獻材不下秋声故得復還他日余游古象山道謁鍊師適當秋半之夕鍊師為一撫弄真鏗然金石声且曰吾宿昔亦何意其得此也既得之又何意其未及終吾生而去也既去矣又何意其復來也吾子試為記之若何余嘆曰古今天下之間事、物、亦何莫而非是琴類也且當時作之者吾不知其何人傳而寶愛之者又不知其几何人而後入于宋之內府而至於王氏以及於

師也雖得之而復似失之既下之而復似上之是皆偶然者也然則舉如是而觀之則吾又將因夫琴而進於理也矣是為記

### 山樓記

龍虎山中周仲簡之私室獨在其西偏已多得夫古木修篁幽泉奇石之勝而復於其寬隙構小樓焉余他日偶來山中仲簡延登為燒香煮茶凡屬樓梁閣之絢麗遠峯近嶂羅列於窓戶者不轉瞬不移武而盡得之也又他日以書來俾記之余嘆曰仲簡亦既出乎塵襟而寄於幽勝者矣而又欲求其益幽益勝者而藏息焉非唯惡為惡色織芥不接於吾之耳目朝夕讀古人之書其微旨奧義以賦詩屬文會於心而發於口者必多於是樓焉得之昔人謂仙人好樓居豈其然乎矧仲簡又嘗登華蓋浮洞庭求搢紳先生而謁焉猷其議論懷其文章歸而溫繹於斯樓之上其進德修業也孰禦是為記

### 榆原真館記

榆原真館者龍虎山孫公父大之所作也公幼入山為清靜言他日遊其東北之支得溪谷長源豐中茂木水石縈護人迹罕至顧而樂之曰吾死其以此為歸乎於是命弟子營之其蜿蜒而豐潤者則虛以為公藏其寬衍者則為屋以守既成而扁其堂曰榆晚榆晚之左曰夕軒公往來所燕息也右曰蘭雪齋古書畫器四所陳也外為門而總額之曰榆原真館云又五年而公卒葬焉至正癸未之秋余登古象山遇其徒周微之於碣石微之曰計子及山下莫矣其宿吾榆原乎從之食寢如歸明年夏以書來曰曩宿子榆原者意必有以記之也敢請曰嘆曰吾見人之營其墓地者孰不欲美且固久也然既沒後之人或汲于其私而累歲不一跡焉甚者貧無行黜其守而奪之利曹不旋踵而瓦礫其屋孤兔其丘者有矣今孫公蓋老者也生而

樂於斯死而安于斯夫亦何所芥蒂然而承葬之者唯恐其或  
弛掃除之者唯恐其不時無以異於公之平日是固出於福德  
之餘施亦由其所付託多才而能賢者也

玄真宮記

玄真宮者故宋樞密馬公天驥之第也初公無子一女曰時閔  
前浙東萊政廉訪司監司黃頭公聘為夫人夫人亦無子黃頭  
公卒歎曰我於黃頭氏雖無子賴有他室子可以不為其宗憂  
願以一身承吾先人顯官之餘而女子又羨於從人不可以繼  
世縱子他氏繼之勢或不能以永思所以永之者遠經而近宜  
莫若身為老氏季為老氏季則士夫良家之女樂從吾遊者即  
吾從也即吾從則必能世祀吾所自出無隙也且吾聞之老  
子之季貴于清靜則神完而氣專可以達於神明苟可以  
達於神明則上為吾君祈天永命次而為我輩壽歲時所以從

有司為斯民者亦將無不為也於是因第之廳而為祀神之庭  
堂為集衆之堂寫東之廡而鍾為殿外之門而象為其飾曰庖  
曰福或因或革一者不可具舉廉士之田皆因馬氏舊某年間  
厲有以其事上聞者皇帝憐嘉其意為降聖書若曰有司徭  
役其無与凡而器用財賄土田強有力者不得奪特賜今額仍  
賜時閔純正守真端靜法師提點宮事甲乙住持久之又有  
以白見 皇后榆河者皇后亦復為降旨以鎮撫之壽昌縣尉  
胡君天祥嘗為僕言且徵記為嗟乎古今天下事物之不齊者  
多矣或得于彼則失于此以常情觀之孰不謂馬氏以公侯之  
貴甲第之華土田之多不能有一子孫保之享之而乃處給乎  
黃冠羽衣者流豈不大可感傷而悲歎然使幸而有子孫不幸  
而其才不能中人則亦未必世為馬氏之物而嚴馬氏之祀矣  
今而閭里相傳不絕於口者豈不皆曰斯馬氏之所建置也况

頌而祀於堂蓋馬氏之宗又况山川之靈且為其孝而有成以  
酬其志為其孝而有成以酬其志則冲和之應將被於物而無  
窮不在其身必在其徒此其為義尤未易以一家世裔之私謝  
為而比量之由是觀之則斯宮之遠上承 君后之命之重夫  
豈徒哉敬為記之如是

重修柳君記節文

宋寶祐末江南悉內附提刑謝公栢得猶集兵饒之安仁縣軍  
校張孝忠湖南人或曰淮西人從健兒三百人謁麾下公為陳  
忠義事以獎之孝忠即感泣請留俄而北兵來襲謝公走七閩  
孝忠領孤軍出戰手刃百餘人馬口中流矢孝忠自刎北兵覆  
以錦袍惜曰壯士：既而孝忠後數著靈異遂配享東廡下  
嗚呼昔襄圍告急之日士大夫輕去就疑羨世祿之鄉連城之  
帥徂：望風歎附孝忠特一小校尔非有詩書禮樂之培養非

有爵位土田之寵固奮不顧身於不可為之時以報知己以謝  
公之義正則事之以柳君之靈明則附之維其資過乎人亦可  
謂生死知所從者矣且乎死而神法率聯而得書

番禺仲公李先生文集卷之十五

嗣曹孫進士邵武知縣李光編  
後學邵武教諭清源黃晉孫校正

春暉堂記

予嘗浮信溪而下見瀕溪有石屏然而起其上如橋梁中空通而  
圓有樹葱蒨、蓊、余嘉之舟人謂此鄉所謂月岩者以似故名每以  
不及泊舟一登覽之嘗用不滿于懷他日過昭真宮訪道士徐仲  
德仲德曰吾有母老且多疾遂營藏于鄉人所謂月岩之右堂其  
倚以奉之扁之曰春暉距宮二里而近度几可朝莫為子為記之  
若何予曰信佳所也是異時吾愛焉而不及即焉者也且君如是  
而名堂豈非有死於唐孟郊之詩乎郊之詩意謂親恩之固極  
猶三春之暉也子心之厚報猶寸草也喻其恩者大而報者小也是  
豈情動於中而形于言感于其言而名諸堂皆孝子仁人之心也然

吾見世之為釋老者多矣一去其家外得所將從則或介然於骨  
肉之間是固昧於親疎厚薄之義無足道者至勤於其師友眷  
眷于父母兄弟者亦為不少今仲德也既不待不離于膝下又不  
得致養于宮中卜其宅而堂為以安之朝往暮來為以娛之如是  
則不違于事親不居于從師亦庶乎兩得之者矣且言異時徒  
以水竹之勝不及一即其所為恨今則又知仲德奉親其間居室之  
完器用之具井滑滌髓之宜無所不勤愛和愉悅之心必不少懈未  
能一敬觀之而先之以言是終不滿于懷者也

處晦堂記

臨川危君先吉一再以書來曰僕粗守先君子之教序有燕息  
之堂者學士清江揭公以處晦扁之意謂先君子之老適當江  
南內附之初會有大臣薦之者 朝廷凡再聘而德甚不能  
行也堂之偏有古松一本其大十圍皮膚若鱗甲有若鬚髮出

鱗甲中沒黑長數寸而下垂者又有古桂七本各十圍枝葉覆  
地花時香聞十里吾得徜徉其下每皆良田四時泉流不竭吾  
得而耕之令吾亦豈有肖似於先君子者而敢擬是名以為高  
頤夙夜求所以弗辱焉耳惟執事賜一言以泐厲之若何余曰  
吾聞之君子之道未嘗一于出與處也惟其時義而已矣逢其  
時可出而不出固也者懷于安而遠于義也非其時可處而不  
處藝也者沒於利而近於辱也是皆不可之大者也今吾子為  
前代縉紳之後論其孝則博攷其行則修察其材則通今公鄉  
大夫由經術而出者相望也發策決科豈吾子所不足哉吾恐  
其不終于處晦而已矣矧聞其先君子見心先生風骨炯然蓋  
神仙中人以詩名當時然則君子之澤殆方流而未已也欽至  
正庚寅春正月作也

應天寺記

余于州習泰鄉梅港之上有寺焉按郡誌初宋太平興國間用  
望氣者言有所獻故額曰應天云建炎初兵火焚蕩尺無碑碣  
可致僧羨曉者藉施助首構佛殿成頃之智宥智宏止勤繼榮  
可勝其力而法堂兩廡外門經藏成又頃之可父于財閩廣而  
鐘樓成里鄒某為鑄鐘且田舍若干畝文殊寺僧立亦田舍若  
千畝孫某為像現音于堂復圖刻諸因果故事壁間胡某建聖  
僧堂亦田舍及園先是經藏所隘王某移置寬隙飾以金碧取  
經錢塘以實焉李某命工作香檠堂上他日衆相與謀曰昔之  
燬頽經營五十年而粗完不亦難乎且故無土田今則不飢豈  
可以弗之記也皆曰然初長沙吳文王芮有將曰梅銷亦以功  
多封侯相傳生此歿葬此故有姓港而居人至今多梅氏寺因  
有其專祠至正初同郡彭君某來巡檢鐘方寨遂逋寇於阡道  
謁祠下謂寺衆曰侯以材智翼楚漢蹶強秦固見諸史凡二千

載而其神猶赫、如是亦不可弗之紀也衆又皆曰然於是  
久造吾戶以請因曰古今天下浮屠之宮率悠久而不廢縱  
而復具不旋踵者何也由其多得山川之勝且世有人為故也  
吾閩應天小山自大江之右蜿蜒百里而至左右復多奇石以  
翼衛之大溪小澗凝清流穢長松高竹掩映空際其僧自羨曉  
而下凡七八輩皆苦而敏于事故能致君子長者之助如此其  
盛而廢以備舉可謂有其人然則寺之昌且久也蓋有不待卜  
度而前知者矣是為記

香廬記

上官君升泰築室於家山之陰蓋迹於父母之藏受命於疇昔  
者也室成鑿池其前清溪而魚連山奇石之在數十里外者皆  
羅列庭戶別築數楹於其西而自扁曰香菴以燕息賓客焉他  
日過余請為記之予曰夫名之美者人之所向死非美者人之

所同舍否也者塞而不通之義也君獨有死焉何哉君之弱冠也即官季于京師未几出而主簿常之武晉表之石載尹太平之蕃昌衢之江山皆有惠政民不忍其去今則又調般陽之葛川以常情窺之似未始否也豈非以其同時並進者或書三接而歲九迂而已独遲回於州縣之間者耶不然則其字曰泰理不常泰否必承之無否而先自否也吾聞之恬於崇卑利鈍之際而憂深思遠者其為君子乎若夫中人以下其視也不出於尋丈其所也不踰于墻壁是以器之本窳者未盈而先覆趨之過疾者欲達而反蹶也禍而後悔害而後懲不亦晚乎今用是以扁其室無乃自寓警戒之道焉嗟乎君之年方艾而未嘗服官政之日長也而慎重若此其能他日以功名終者非君其誰是為記

棟華堂記

臨川雲林之山廣柔几百里傅氏世居其間以明經顯以武斷保鄉里者前後皆有其人其居於白蟻者兄弟三人長梓字元達次煥字元明次魯字元采甚友愛也能遵其先人之命毋析居異村故自名其堂曰棟華蓋取詩常棟首章之言他日來謁記於余、諾之數年而不酬忽自念曰言之來無乃欲益聞乎李正卿嘗錄事平江為余言平江有某氏者兄弟三人父母終孟生殖仲應門季幼唯嬉游不事、二兄詎弗悅且當索酒肉以飲食其所與游者久之二兄謀曰季也殆不業乎莫若分而听其自覆既分季置酒召所與游者醵而曰吾疇昔孟兄力生殖仲兄持門戶吾無所為故能與諸君游也今則肩負不能從諸君後矣請由此絕既而生息日滋二兄日之業婦之者半惻然曰向賴二兄前公私皆給故長我逸我有分以及我今二兄乏若是其復共乎妻怒曰若往游時若二嫂搗及吾面者凡曰

家之索必汝夫之由若何復與共不聽聚其宗而焚其券如初  
嗚呼孰謂衰俗下甚絕無君子是厚誣也平居以称度為心者  
分才而錙銖甚則聽婦於內交諛於外而無不為其人豈不自  
智視彼平江無乃愚乎傅氏固儒家薰陶講貫之日長宜其賢  
也彼平江者賤財貴羨蓋得於詩書之間耶果出于心自能然  
也抑所與存者朝夕開迪而誘勸之也嗚呼至誠之道通乎天  
地合乎鬼神可以擾蛟龍可以蹈水火可以冒鋒鏑或馴虎兕  
之暴或感木石之頑矧孝友乃其常分或失其人乎哉正鄉非  
妄士物故久矣雖不記其所稱者之姓名而亦果為元達兄弟  
道也是為記

看雲聽雨樓記

樂平陳子構二樓於屋宇之高一以看雲為一以聽雨為李存  
聞而謂之曰夫世間之物有形有聲者何限陳子之看聽狃專

於雲與雨者何邪且雲之與雨油然而作沛然而下而後吾之  
所以看之聽之者隨之或玩之而有悅或厭之而遂悲不知方  
其未始作也未始下也而吾之所以看之聽之者果何在邪又  
不知及其既作而滅也既下而霽也招之而不可得望之而無  
其所而吾向之所以看之聽之者又果何在耶又不知吾之所  
以儻焉而看儻焉而聽者與其油然而作沛然而下者果有以  
異乎否邪又不知雲之與雨其形其志千態萬狀至不可以象  
類言者亦有意乎人之看聽而然否邪明乎是則雲即我也雨  
即我也庸詎知夫子之所以看雲者不猶雲之看子邪子之所  
以聽雨者不猶雨之聽子邪非看而無所不看非聽而無所不  
聽則將於二樓之間目之所接耳之所遇足以證此理於無窮  
者又當不專在乎雲與雨也

胡君茂卿以心隱名其堂請予記之予曰迹之隱者或為人  
之徒心之隱者多為己之徒是故文茵華穀有不足為之貴也  
巖居中食有不足消其馳也茂卿亦邑人也堂為而名之以此其  
無乃有志於為己也欤然心也者愚乎而謂之隱愚乎而謂之  
不隱謂之隱也亦何所置之謂之不隱也亦何從執之初茂卿  
以通敏得推澤為縣曹余觀夫世之人未有所立而遽從事夫  
政也充訟乎去勢之場汨沒乎貨利之淵其於日用之間亦鮮  
有不憧憧焉而不知止泊焉而不知返者今茂卿則泊乎殆  
無慕於外係乎殆無所斲於人之心也雖謂之無所隱為蓋不  
可也然其於斯堂之間隆師友以導子弟惟恐其不為善人時  
尊俎以洽故舊惟恐不盡其歡心以巾以帚而未嘗纖塵也或  
琴或書而未嘗虛几也炉有焚也瓶有折也堂之傍又有一畝  
之園花木果蔬必身理之宜鋤而鋤宜鍾而鍾瘁而糞之藁而

灌之。心也果謂之有所隱焉亦不可也然則初無隱也亦無  
不隱也茂卿能於是焉觀之則予雖為若記斯堂也而實未始  
有所記也

### 雲錦觀記

上饒龍虎山二十四巖之下有方石焉望之爛然而紋相傳曰  
雲錦石漢天師張君嘗鍊丹其下後之學者從而廬焉宋宗寧  
中得賜額曰雲錦觀已而廢於兵紹興間有周昌臣者始葺于  
鐵壚原未幾而昌臣死遂以復廢淳熙間都錄劉君用光以道  
術顯于時有撥賜沒入田而以食其衆慶元間倪元興病其界  
隘遷于楊家塘旁有古井謂能時出五色雲氣似更與雲錦之  
名宜者然苟合而未完世祖皇帝一天下貴清靜之教上清  
宮道士葉君繼靖住持茲山他日因循觀而南可百步顧而左  
臺山右塵湖前為應天諸峯而後則雲錦石也因喟然嘆曰茲

豈非天與神授者邪遂議以改為請於王教真人而許之大宗  
師吳公亦親為之接行者德傳君應辰又助之役為殿堂門廡  
凡若干楹庖福庫廡各以次舉共為工一萬二千有奇嗟夫吾  
輩經行茲山間亦甚愛其蕪厲潔削洞穴祕怪而草木積潤宜  
乎慕道高世之士擇焉而居之殆紛華之竟不交於前而塵垢  
之事罕及也然茲觀者再廢再興凡五遷而始定其無乃有冥  
漠之相為勝幽之尤者邪夫如是則其於制鍊吐納之事將益  
靜而益專成於已而及於物者必矣葉吾字克承儒家子其先  
古睦州人秀而通茂而有恒大德中嘗從開府大宗師張公于  
京師聖書授全德統素通玄法師教門高士紹興路瑞應宮提  
舉知宮領本路諸宮觀事既又捧表闕下再命提點雲錦觀事  
云至順元年八月十五日書

番易仲公李先生文集卷之十五

番易仲公李先生文集卷之十六

序類

贈祝蕃遠序

大學之道不明於世久矣繇士大夫靡然以文藝相許與至有  
能自持而不流得之於一者則又謫之蹠焉何斯文之未  
幸也上饒陳先生立大潛心於聖人微言而履踐之未嘗一泥  
於訓詁蓋二十餘年而人莫之知也雖其弟子祝蕃輩亦皆卓  
出於類存欣然慕之將以明年往造其門上承先生之教下取  
蕃輩之助既而聞有司舉蕃茂才異等且中其科牒而致之行  
省去且有日存私心甚惜以則大喜何者江淞之士踈多秀敏  
而又共際於四海統一之時光深弘厚之氣有入於其心修省  
變化之言易以相感夫然則是蕃暫棄一存於近而得存於遠  
者有不可以算也是則無所於惜而有大可喜者中吾於利未

論也

送張仲舉明春秋經歸試太原序

國家以科舉取士之選必由於其鄉延祐七年春張仲舉將由錢塘歸就試太原不遠千有餘里以書來徵余言仲舉明於春秋者也春秋聖人是之非之之經也故曰知我者其唯春秋乎罪我者其唯春秋乎然昔之傳是經者固或溺於意說後之踴為通是經者亦多托諸空言經之不明其來尚矣吾嘗謂使真知春秋者一日而由乎科舉得為政於一州一邑而推是之非之之羨以是非其民則吾見春秋之羨明於一州一邑者也又使得序而進立乎朝廷之上而推是之非之之羨於吾君吾相之前則吾見春秋之羨明於朝廷之上者也亦豈非夫子作經之意哉亦豈非吾君吾相求明經者之心哉亦豈非吾民之望哉亦豈不大可為科舉慶哉苟其志不於此乎在而及之

為於窮達利鈍之際則其於春秋是非之羨為何如耶仲舉諒直君子也其必審於斯羨而非托諸空言者也之行也吾意其鄉之好事者必相與樂推先焉而有司之明者亦將無所失也

南徐紀行詩彙序

南徐荆揚一都會也賓海門控大江山有金焦舟陽吳會連其東漢沔接其西魚鹽米麥之商往來而集前年里有轉穀于淮者謂存可附致一遊時存教授于家不且曠然以去且雅不便舟中拘縮以故止然念未歇也大德十二年浙東西大饑南徐尤甚郡命邑宰汪君稱隱部糧五千餉之君自始發訖家幾百數十日凡慷慨乎登臨之際藹佛乎事役之餘以至於羽人釋子之所栖息篙工漁夫之所便捷鯨豚之奔播鴈鳧之紛呼濤瀾草樹風帆烟檣以吁以釋者一寓於詩靡遺焉他日以示存蓋百餘篇讀之竟殊歡然有得是吾於南徐也可謂不行而

至己矣。雖然林岩之其幾有貧屢藝。如存者乎。屢幾君詩之傳之廣也。亦必有得存之得者矣。於是乎書。

江淮運餉詩卷序

士之不能持深守固一遇利害如髮則憊然為之動矣。若是者烏足尚哉。紫陽汪君來簿安仁之一月。潤飢移粟於郡。郡檄焉。部之君得檄即行。絕大湖浮長江帆數千里。犯濤瀾之掀播。觸蛟鼉之隳突。虞於盜賊危於疫癘。以常情側之孰不歎其勞。苦險遠鬱然而不爽者。而君之歸也。曾無幾微見於言面。方且披翫雲月吟咏。情性吊往古之陳迹。訪草萊之修士。德業無所施。公事無所懈。豈非利害素定。才智有餘。持深而守固者耶。他日為大官臨大事。優游容與。蓋有未見而信焉者矣。好事之君子咸贊歌以美之。而屬李存為之序云。

贈貴溪縣梁尹序

百司之接於民也者。莫州縣官若也。州縣官之怕其位正。筆而舉錯之者。莫尹若也。是故宰天下者考績之際。宜於尹為先得其人。則一州縣之民安。不得其人。則一州縣之民不安。國朝縣有監有尹。有丞有簿。六曹之史有典。丞理也。制則密矣。然豈能皆心於為民父母者哉。假有一事焉。或雜舉錄例以害其明。或播誘兩造以撓其正。決而行之。則議之以為專固而持之。則訟之以為私由。是而引歲月飾案牘。其有能盡達於民情也者。幾希。梁公天泉來。尹信之。貴溪縣且六年。安仁與貴溪接壤也。而公之嘉政日聞也。果於斷允。協於同寮。關公田不勤於細民。進衣冠而尊禮之。辨岢強而制抑之。其亦必精心拔慮人百其才者也。今且去也。而向君時好者。邑之佳士人也。倡為詩歌以惜美之。而徵序言於余。是用書所聞焉。

贈陳仲達序

余幼多疾一嘗從醫師涉神農黃帝之書下及張陶孫許數十家言欲以稍知疾疢之所由起金石草木寒熱溫涼之所由用既而姻友間意余卒業踵相問或內顧而難之則咎余要秘也一八十媪痰吼上氣脈急出余曰脈當病可作蘇子湯一劑已明日死也一女子脹急不穀余曰此血閉病也法當以乾漆三稜葶治之不可更醫則孕氣不和證也一女子苦濕痞脈肥溢指余曰不害明日作猪苓湯投之已晡時死也一男子溫熱上滿下泄鼻出血余曰在傷寒法此為陰陽離絕不治更醫乃已嗚呼茲事豈易言哉古之人不涉獵以為名不欺虧以瓦利幽探於五行之運著察於風土之宜然後審別製劑而中若余者志學於儒家者也不專徒兩失之今絕口不言醫邑人陳君仲達緝其家緒而精心焉仲達博采強識皆出於余而又勤然不已勤焉焉不已亦豈有萬一如吾所為而吾猶瀆告之者

何也愚者之嘗謬而智者之取鑒也

送朱可方序

朱君可方退然有慕於晉陶處士淵明之風俾朋友之能文辭者咸述之而僕切疑焉蓋嘗聞諸長老前五十年東南士君子之有志於四方者局然慌然不得過大江一步今幸遇明時際天極地無不交車轍馬迹焉而天子又憂乎林壑之間有不屑於自進而非常調所得者復為成周賓興之禮以來之夫如是則士之進者或可以少愧而上之求者亦不為不盡其道矣可方優於學而未始仕也而年又未始老也析經義之精微陳古今之得失非可方所難使一日勉焉旅進於場屋之間有司未必失也然後唯天子所命陳力就列他日老焉而歸過彭澤舉一觴以告淵明林田而飲種豆而食籬其菊而逕其松未晚也雖然僕非有動於勢利而為是言者顧以勤苦而為

學遇夫有道之世不安於獨善其身者當然也

贈吳伯厚貢士序

自名實之辨未而取人之道以微蓋由來久矣入國朝制天下州郡歲舉茂才異等者二人士之稱在茲選者繇郡牒而自達於行省由行省而自達於吏部御史察之國史覆之然後命以九品文學官亦可謂級焉詳焉宜得人焉者也至大二年春吳君伯厚以牒行過別於余責一言以相奮余曰嗟乎天下至廣也歲牒而往者至不少也亦豈有敏給而文十一如吾子者乎亦豈有為國家典茲事者不能別吾子於群者乎亦豈有別而要之徒萬里之來者乎亦豈有成其名償其勤不說於君子者乎用是卜吾子之行必偶也遂書以為贈

贈張舉之宣城後序

國家選人之制上焉曰儒吏兼以為儒不律則疎律不儒則粗

然而今之持文學之長者舉曠放而過情快刀筆之能者舉苛深而多害難哉人也余居溪山之中雖未嘗一涉千里之外稍覓天下之俊美而近識李君正卿焉李君江西人有儒者之溫良而無其曠放有法家之鎮密而無其苛濇必欲試吏而取則李君真其人也李君嘗為廣西憲史矣見信於其上見愛於其下再調而尉安仁亦如之李君真可則也孔子曰空言不如行事之深切著明也今子兼二家之長才而有試吏之志故吾舉李君為贈則見賢思齊擇善而從之羨裕矣尚何他說之有乎

贈張仲舉遊宣城序

君子之於學也上不得名公卿大夫以開之下必取良友朋以發之不然皇之為汲之為古之人胡為乎稱也徐泳中嘗為余言宣城江東上邦也而憲府之所會也吾客居十有五年其大

夫來者無不文墨論議以降接士儒其士子弟之遊從者無不  
遜順于訓克於有成其主人無不時月禮致問遺以安美哉宣  
城之風也余懷焉未之能往而張子先之張子中州人有氣義  
其文辭慨然慕先秦西漢其詩慕晉魏盛唐勲業之餘頗願從  
事於當時者也而之行也豈不見接於名大夫不見接於名大  
夫亦豈不得良子弟從遊哉亦豈不遭賢主人以相處與哉

送寧國李總管序

延祐元年冬制江南東西道及浙西道民先自實土田時李侯  
某為寧國明年六月省命侯來視饒州之荒乙卯及安仁丁未  
是為七月之朔侯從邑大夫謁孔子廟觀士輩之放踈視門廊  
之汙弊咨嗟久之進諸生而謂之曰學校之所以隆於天下者  
才夫人而已耳今國家復爾身廩爾食閭閻辨則爾師游息則爾  
舍 新天子又以貢舉吏爾屬爾屬且少自慎責已矣若夫膠

膠焉於斗升之獲者是走 賤人之事也非士君子之行也故  
曰細人也服利君子也服禮 也者敬而已矣為人子而不敬  
失其所以為子為人臣而不敬失其所以為臣才也者才之為  
人子為人臣之義也雖然吾為多言矣亦蓋有爾侯爾大夫焉  
於是諸生皆深然而思躍然而喜退而相與為詩以美侯之教  
而俾其也序其首云

送王既明序

延祐二年秋八月壬辰雲錦山道士王既明奉其師嗣師吳公  
之命往主夫闡臨水廟神之祠過別於余且徵言焉吾葺自禮  
樂刑政之微而鬼神之神始著雖若幻若荒若不可度且詰者  
而善惡之復殆無毫髮對焉君子明之衆人昧之是故或憑物  
而言或假寐而通或交於陰昏之際或震於疾癘之間吾嘗以  
為上古之世之人日遷善遠罪豈不待夫尔也故我朝歲編禮

名山大川屢增祠官之秩皆所以敬鬼神輔政教也今子將夙興而夜寐贊乎神而接乎人陳其禮幣所以申其誠也肅容儀所以齊其心也通其言毋致其濫從其俗毋徇其荒因其中之有敬也因其中之有懼也導之為孝弟焉導之為忠信焉如是則神之所以臨夫人者有不皆在於驚動禍福之末而人之所以贊夫神者非徒祘於牲牢圭幣之餘者也抑吾又聞臨水女神也閩人相傳其親死於妖憤且報之亦死焉果然則孝心之烈登諸國典而食是邦也不亦宜乎

別汪子盤序

今以鄉試來錢塘適與友人新安汪君子盤會焉相問尊若幼無恙外君以別後所為文示余其辭氣多嚴重簡寡有以知其用心專且勤過於余也余數年來得師於上饒問學之際大抵謂聖賢之業之見於言語文字者無非明夫人心而學焉者亦

必於此乎究余則退然而懼愴然而省庶幾乎求免於雜而結也而疇昔之知余熟者豈有多如君家父子兄弟者乎尚賢而樂於聞善亦豈有多如君家父子兄弟者乎深願與君共論而舍館適相去遠甚相過又輒不遇既又迫東歸而君徵言至於一再思不可重相負也書以為別

贈浙道士程能靜序

余曩年館于邑之崇真觀有道士劉某者處州松陽縣人也相與處數月屢言居松陽之卯山有玄乙堂楠趣菴其所營也請余文為予意其嗜尚不類於俗為之記其堂與菴且賦其婦今殆六七年每思之隔千里他日有程君能靜來自浙氣甚清問其居則劉之邑里也謂劉近所為事甚悉予喜如得劉也又之亦以贈言為請其再四不異於劉余有以信夫文雅之習多在於斯見於老氏者已如此儒而好學者必何可勝言由是相

率而詩之者五人予則序其故并欲以遺夫劉也

汪稱隱安仁詩藁序

至治初元之秋新安汪君稱隱以書拉僕曰吾主若安仁簿時凡賦詩若干首願子序之顧僕也亦何足以序君之詩然意君平生之所更嘗者多矣見於文辭者亦宜不少而獨於此乎微言其以僕為斯土之人將從之舊有以知其賦物之精切託興之深適歎君嘗由夫安仁調而為杭之錢塘及今則為金陵堯庫錢塘之為邑也土地大民物蕃方伯連率之所近蒞百司庶府之所交集朝徵而莫役星飡而露止堯庫之間則會計之勤稽檢之密變通之利或不周於細激委輸之重有不遑於履食豈不自念疇昔之在安仁也土無百里民不滿三萬家退食之餘則所與先後而左右者皆逢掖其衣章甫其冠者也興之所到有不自己條然而成大篇悠然而成短章風雲月露之態於

我乎莫道林壑泉石之勝於我乎無隱亦何暇計其位之卑邑之陋耶但見吾詩之日工且富耳故今茲雖於叢勩之餘而猶玩乎其時之辭諉諸朋友以章之者僕於是乎或有以窺君之心也然則古今天下之事無小無大蓋誠有難者矣惟君子求所以易其難耳害之熏灼固猶火也而利泊溺亦猶水也苟能於此而兩忘焉則此心之良直而達之於事君臨民之際感而形之於興觀群怨之音者皆無邪之象也抑亦奚易而奚難將見君之名位雖益高責任雖益重何適而非安仁詠歌之時而後有以信其進於詩者進於道矣夫至若雅國家之治頌神明之德自宜有大人先生係天下後世之望者為君不一述之於僕也不腆之言乎何有

饒陳又新真人赴京序

夫人之於行役也有遂焉而以喜有離焉而以憂是皆不得其

情性之正者也苟徒具乎觴俎以樂之蓋不若發為聲音以和之然非其氣之所孚志之所同則亦胡為而為哉 二年冬十月龍虎山中明復真人陳公以其師之領祠官于京師也而已嘗佐之特往省焉真人遊乎方之外者其止其行無喜也憂於何有而吾黨之游之士與其徒從之秀茂者亦從而為之詩凡若干首俾僕序焉僕聞隨世之音形於草野之間者蓋著於朝廷之上今二三子之作也懋而豐婉而不淫其始國家禮樂百年之所致歎且真人之此行也適新天子即位之初必將裁其冠錙其佩而服勞於類望之間酒醴之氣圭璧之光有以達其精明天子錫之公卿大夫禮之亦當有任二雅之音如召康公尹吉甫者美且及焉足以脩絃歌而永金石使千載之下於焉而興於焉而觀者蓋可以草野餞贈之華卜之也抑吾又聞真人之居山中也日與能詩者相倡和或過午忘食或竟夕

不事寢由是觀之則向所謂氣之所孚志之所同者亦信乎其有徵也

雷易仲公李先生文集卷之十七

送上饒黃熙序

上饒黃君壽卿教諭吾邑數月其子熙來侍左右將歸凡與之  
遊者或賦之以寓異別之情或詩之以結久要之好燦乎其有  
章錫乎其成音而俾余為之叙余曰夫中人之情得從其親以  
官遊者有不間於位之崇卑勢之間要往以娛目騁懷為務  
至或有嗜利之習淪入髓骨者亦或有徒荒蕩而不知還者雖  
將以廣其聞見適所以溺其身心如此而可惜者比而是今  
熙之留此也從琴師交吟友及其歸也則求言請贈唯恐離群  
而索居嗟乎其今日之所養固有可見而它日之所戒獨不可  
得而前知乎

送龔大和隨天師入朝序

皇帝即位之明年詔江南張天師入朝八月丁丑天師行選其

徒之才且藝者賢有德者壯可行者若干人從而審易嬰君大和與焉吾聞天師每朝親時國有大祈禳則命之天師帥其徒為壇而醮焉懸鐘磬陳寶玉立五方旌旗其響應往來如桴鼓又葺其在道路也民有疾癘輒扶老携幼滿其車下甚至壅遏不得前天師則戒左右宿符篆囊而佩之俾一一得所欲而去嗟乎非天下之至誠其孰能與於此宜乎大賚於朝而有以及於其人也君今之為是行也吾見其被壘書而列於祠官也有日矣於是乎書

送章巡檢序

安仁之西壤與臨川接其細民習於輕悍一有水旱輒群聚相剽劫富家巨室至夜不能枕余見時有淮人方君某者來為尉阡然長不滿五尺善騎射有膽氣三年所撲滅窮根株不少至今西壤人畏之而一二餘老兵猶能談數十年間庶政理修歲

無大饑咸安生樂業而警戍之吏又往往以其暇裕撓民訴訟縱卒苟年雖幸以代去然鮮有全善譽者章君齊賢之來為白塔也律已以廉馭下以莊而白塔改為邑之西壤齊賢居官凡五年如一日今其去也自其鄉之大夫士以至於販夫牧子無不誦其美而懷其安異時使者之行部及有司之吏議皆未始有所謹訶信乎其能官而有譽也歟昔方君之去安仁也年已踰五十吾嘗謂使其人居邊疆得自部一卒已上亦必有以立功後不知其何如每惜之今齊賢之去白塔也才三十餘耳而輿人之論謂也才章也以德其所以逢時効職雖若有不同然者是皆人所不能忘也故因獲序諸公餞詩之末而併及焉

劉道士煉丹序

余未始讀神仙書蓋不通其制煉金石之方今醫家所當用亦

十餘品而成雜之以草木臭味其扶陽抑陰救危疑於倉卒之際殆亦仙方之餘而養生之所不可無也然精其事者率多隱於名山大川之間惜不能南訪少探計焉冲虛山中道士劉範者頗有志於是善語之曰古之君子凡所為者先其義而後其利故義著而利隨之况丹者人之所服食尤不可以苟按本草朱砂生符陵山谷形如箭鏃如芙蓉花者良出他土者率不及其碎末者特紂工瓦耳又諸石或火煨醋淬擣須千萬許或水飛研如粉無志不爾者人腸中能作癰夫丸而售之誰得而辨焉在於不自欺尔不自欺雖欲坐進於道無它歧也况丹之必售乎吾愛範之貌魁然範之氣藹然故其所以望之者有將不止於是焉而已也範字彥基又知讀書蓋儒子云

送玄卿入朝序

至順元年秋九月龍虎山薛君玄卿復游京師其鄉人何素率

其友之能詩者若干人咸賦以餞之而俾番易李存為之序存曰君之往來京師也數矣雖萬里若通鄰左然至則有大宗師為之依歸行則有供給之裕而無旅瑣之况也似於人無所改視而易聽者而何以言為顧君素有能詩志往在京師時凡公卿之好文辭者必交其歸而居山間也非清流勝士則不與之接然則倡和之樂在彼而離索之憂在茲矣是以懷慕繾繾之辭蓋有不期然而然者孔子曰事其大夫之賢者友其士之仁者由是觀之則四海之間千載之下蓋或有因是而推知其為人者矣吾之叙也烏乎辭

復送薛玄卿入京序

世祖皇帝平江南上饒張公以黃老言進得賜號大宗師出入禁闈者凡四十餘年張公往矣而番易吳公總之由是其徒之魁竒俊拔者皆彬々焉往來京師以為常庚午之秋薛君玄卿

復行其交游間無不詠之歌之以為餞何生大易集而成卷嘗  
俾余叙其端而臨川彭舉復得若干首亦微言焉余曰君之行  
亦光矣是何詩之者之多也或有以美其實或有以勉其所未  
至其得此於人也亦必有道乎雖然吾竊有私焉吾幼而多疾  
今駸乎其老矣學不足見知於人才不足為時用也日食米  
一升酒再觴尔夫豈不知自量者哉顧古之君子亦或有尊德  
樂義而驚然以遊者而吾獨無是心耶吾喪親既已二豎子  
且長能聚糧治裝斯亦遊矣游必先京師先京師其必以君之  
師生為東道主下榻之餘借之以一馬導之以一奴望宮闕之  
偉麗闡明堂辟雖之制而瞻大駕之北巡也其於公卿之間有  
果能以尊主庇民為己任者吾則求往拜之後來之英有自視  
不碌而能虛心委己者吾亦願與之語然後翱翔乎灤河之  
上少栖息乎西山之阿其去也則道東魯禮先聖之遺像訪三

家之子孫如是而歸則終焉而已耳然不知吾之行也果何時  
耶又不知吾能行時君無它後而在京師不耶又不知吾及京  
師而君無它後其相與之意有不異於今日不耶姑因是叙而  
要之亦以塞彭子之微云耳

老：堂銘并序

金溪彭萬里年五十而喪配羨不忍再娶願男女若干人皆幼  
於是迎其外姑李氏於家以老因扁其堂曰老：進士朱君元  
會為之記而請番易李存銘之銘曰

人生伉儷不幸不齊異母異情幾續而睽顧此呱：孰恤長之  
賴外姑存未及于哀亦豈忍心下坐吾惟朝飢莫寒庶有所離  
或哺或縫吾女之兒母見子：足忘其悲子見母：慈而益慈  
女長而笄男壯而妻薦其甘香羅拜歲時孰謂人老非吾老為  
休哉彭君裁變而宜

送張平可序

皇帝四年詔天下以科舉取士秋僕與於州縣之貢歸自錢塘訪舟玉山縣適與豫章郡張平可同載而下平可為老子法其眉目江山風雨之色蒼如也携二侍者一奴謂其所從來則由真而揚而潤而常而蘇而秀而抗而嚴而澗而至於此時且牛載水陸且數千里僕意平可慕乎玄寂者也亦何故不憚數爾也頃之平可又謂余郡有開元觀者久廢吾佐吾師徒手起廢逾二十年而宮宇以完今教主大真人更名玉虛曰諉吾提點之吾慮夫無飯吾徒者是役也謁財諸貴富者而田為僕偶於平可有感也近經上饒道中所見通川橋梁凡五六大者至百楹槩其瓦石椽楠構結黝聖之費動數百萬錢而皆白蓮社中人成之彼白蓮社中人非有公卿貴人之資率多行乞四方亦或伺夫過連馬也者而丐聚焉嗚呼不亦難矣乎哉雖耳見

未出於求福利者而亦博濟之餘羨吾則於彼重有感也大江以南學校之間廩粟之多其名為祀先師修宮墻購城後學者也而來董其事者得不狼戾其間至鮮矣固不當責其丐貸有為如白蓮社中人者亦豈敢望其竭心力圖祠事於永久既字且田以安夫後如為老子法之平可者乎嗚呼向其儒者之不競也而往々又卑之弗口以為儒者之業豈於此乎在雖然豈有聖賢踐修之實特假夫濶論以自解者耳益以蔽其心之不愧於彼也故書此以嘉平可之志亦庶以白夫吾黨之士其或有然吾言者否也

送劉縣尉榮甫序

仕於時者非但無賄之為難而御吏之為尤難苟知無賄已不為狼餐鳥攫者之所動搖效甘薦脆者之所惑感而不免乎來者之銖求僚友之酬酢妻妾之奉服食之美未有不中道而變

為者也無賄之難不其然乎其或確然有以自立毅然有所不為知食君之祿除民之害而無私為者羨也盡其在己而無祈乎其上脫有不幸出於防閑之所不及者命也如此則曩之所謂難者又將有不難者存州縣之胥諳練乎民俗之情偽慣嘗乎官長之巧拙自其幼而學之壯而行之者無非欺公罔民之事蓋其祿不足以仰事俯育名未足以取青拾紫使者之行縣稍有風力而振舉其職者械繫箠楚朝施夕用然亦何若而為之故放其良心而不知求者亦其勢然也勢既如此則其念之間何適而非私彼其所掌者分而官長之務摠彼其所資謀者衆而官長之黨寡至又有同僚之暗謬者則託之以為腹心編民之豪黠者則援之以為黨與御吏之難不其然乎其或明足以燭微而不為其所昏蝕通足以合變而不為其所陷竝右吾之誠或有以革其面奮吾之斷或有以折其姦如此則曩之

所謂難者亦將有不難者存然能無賄而不能御吏則其政多出於弱而無以及乎物能御吏而不能無賄則其設施多出於術而不可以訓今縣尉劉君榮甫其於無賄御吏兩有所長者嘗有祿于時者而其廉稜介厲之氣人不敢干以私它日嘗攝邑事吏胥之狎玩者往、為之屏氣時鹽法甚嚴也而君則稽市肆之貿易而貪者不得以偷便郊郭自寧謚也而君之宵巡未始以寒暑休嘗指其卒徒而謂人曰若屬文股肱操凶器習鬪事雖曰所以弭凶也而不弔緣為凶以殘吾民者幾希一有縱橫必痛繩之又嘗親邏境上異時之行者每託焉以即富貴之家戈梨苟牛雞狗為之不寧君獨裹糧索飧莫則求為仙佛者之廬而栖焉又嘗曰為入之道正而已矣雖正之為羨有精百粗而君之所為殆亦出於天性不皆矯激以為名者也上府

之聽讒嫉者嘗欲擗之而公論卒不可泯使者之不辨蒼素者嘗欲抑之而微疵終不能以深中嗟乎非無賄不弱而有及于物者乎非御吏不以術而有可訓者乎今聞廣東憲大夫蓋有知之而檄其入幕者矣御史王公又復列其政績于臺矣去此而加勵其平日之志益廣其化民成俗之方將有及於物而可以訓者益不細矣吾黨好義之士惡得不樂為文辭以勉之哉

贈李晉仲序

吾聞金陵楊公志行之為人屹屹而不阿其蒞官也靳然不可干以私心切慕焉他日得歛人汪君稱隱書謂嘗於京師識公為記其堂與菴文甚奇而倦書不能寄也其甥李晉仲教授餘于有繕本可試從晉仲索觀之未行會江右道士聶以此從餘于來嘗謁晉仲有其文亟取讀之初不能以句若崖崩岸斷上下千尺而輕禽捷獸莫之能緣也若飯糗如草於窮山絕

谷之間而肉食者自鄙也若車馬於羊腸九折之途而銜轡榮華之嚴斯湏不能忘也遂益有以信公之為而以此又謂晉仲亦綽有舅氏風由是不但有慕於公而并願識晉仲為天曆己巳適惟賓興之歲七月之朔客有以晉仲將行告者僕曰余固未識晉仲者也而謂之不知晉仲可乎其行已其績文固皆有所自來雖已受命而及物之志政爾未自歎是行也并之春官而進對於天子之廷者非晉仲其誰乎而干越之友亦皆裒然以功名望之形於詩歌者成卷僕因得以平昔有慕於楊公而并欲識於晉仲者叙其端云

贈趙舜咨奉母之晉康府史序

上饒趙君舜咨以儒家者流為晉康府史至順癸酉之春會有江右之役便道過家奉其母以行其鄉之交友咸為詩文以寵餞之且有介其微言於僕者僕曰吾見吏於廣海者多矣往

因其物產之富貨寶之聚而民俗溥且愿也則從而魚肉之夫  
魚肉之者負君命而失民望固不待論求其所以樂其身以封  
殖其子若孫者尤不足論姑以其名稱美者而言則將必曰欲  
有以娛悅乎親者也夫孝子仁人之於其親不使有一毫憂懼  
於其心國法至密也人情至險也娛悅於可指可視之間而憂  
懼於不睹不聞之際娛悅於俄頃而憂懼於無窮娛悅於政刑  
之所或免而憂懼於鬼神之所不可逃果得為真知愛親者乎  
合吾子之徃役於彼也旦而興安親而後出也莫而歸安親而  
後息也是皆以一毫憂懼其心者哉量祿而制用輕暖於身者  
雖未備旨甘於口者雖有時心舒愉氣和平也心舒愉而氣和  
平則六淫不能賊也六淫不能賊則雖歷險阻紀瘴癘若不出  
戶庭然子毋疑吾言方今朝廷清明賢公卿擇士如恐不及自  
求之福終來之吉蓋將有不期然而然者矣

送陳德輔之金陵從閔先生序

夫理有所未燭而過有所未知苟非上智其誰能免不然紀霜  
露起險阻躬樵爨甘藟鹽古之人亦胡為乎然哉蓋其信之也  
不篤則其求之也不勤其求之也不勤則其得之也不實疇昔  
之歲覃懷閔君來遊吾大江之東而上饒陳氏最先客之其為  
教也凡進退揖讓之間奔走使令之際苟有差忒毋或假借其  
講說經史條貫悉備若經之有綱若牆之有秋與之處鄙背之  
氣將泯然而自消既而移家襲慶而陪講於鄩庠吾不見且  
十年矣至順癸酉六月某日陳氏之子輔不遠二千里徃求焉  
以卒其業夫師之賢善教者固未易得而子弟之勤且勇不足  
於己能不難於未聞不膠於故常之習不屈於囊橐之費  
為尤未易得吾用是有以知輔之此行也必將有所成矣况金  
陵為公卿大夫之林苟有餘力更能求其仁者賢者而善事之

則輔進也又將有不止於吾所期焉而已也

贈章德輔遊京師序

余往來貴溪上蓋二十餘年溪之南有山特起多怪石佳樹為  
弦誦之堂為冠褐之栖余皆累：遊焉獨其山之既曰五面石  
者未之見也相傳謂唐吳緬讀書之所訛而云然意其間必更  
奇他日果聞為兩石相倚若破而不合仰視其光細而且長人  
號曰一線天其下闕而深呀然而有容余欲遊之而未果既聞  
龍虎山中道士章君築宮其間宮成命其猶子德輔主之余於  
德輔有同舍之好蓋謙靜厚和君子人也亦屢欲招余遊往  
以物役孤其意然未始忘也方將以明年春援琴挾冊其間以  
有德輔為之東道主也懋盤石涉清流雖累月經年宜未吾厭  
忽一日德輔過我謂將為京師遊且徵言焉余咲曰吾方倚子  
為東道主以少息夫嚶：擾：焉者子其知之而姑為此以拒

我耶殆不知而出於偶然也人之於其行止也有不可以意為  
如此哉今吾子之於是役也一以觀京師之壯麗次以習宗壇  
之威儀間辯於縉紳之林而翱翔乎郊魯之郊間見者宜日廣  
而更嘗者宜日多也其毋以我為意吾且為廬阜或武夷行也

逢遇錄序

士君子所逢遇之不齊而或不足以汨其心移其志者古今天  
下蓋所同也橫梨而賦詩乃在於遇敵制勝之際而掛經於牛  
角則又出於勞筋苦骨之餘上饒翁君以儒家者流而嘗從事  
於律積歲月可以典州縣之按牘頽乃暫寓焉於征商之官以  
其休息取古今雜著有足以快其心者而類次之久而成帙自  
題之曰逢遇錄他日寄以示余：曰甚哉君志之不移而君心  
之不汨也夫以征商之任曉：乎接于耳者無非物價之低昂  
紛：乎交于目者無非商賈之往來窮日之力銖：然取之於

民周月之間則又挈然輸之於府田祿之制不及而資格之  
限甚嚴其所以取給於朝夕者私其贏焉而已耳吾嘗以為雖  
甚賢者而處此亦不免有以昏其氣而怠其守者君則獨不然  
且今所集之書無慮數十家亦無慮數千百言取其所以先  
之事實以厚其本次之翰墨以發其文焉之方外以暢其達終  
之諧謔以破其拘然則君之所以為人者其庸不可知乎方今  
名藩大府之間公卿之賢者多矣而君亦豈久於征商者哉必  
將有禮而致之幕下者它日而進是編也夫豈無一言足以動  
其心而及於物由是觀之則是編之有庶乎其不徒矣

番禺仲公李先生文集卷之十七

番禺仲公李先生文集卷之十八

序類

贈鄧深秀地理

安仁之東南有山蒼然在百數十里外者臨川之雲林也每  
聞其間特起而為峯者凡卅六峯之顛泓然而為龍湫者亦數  
四清泉懸流下注良田數萬畝歲大旱不飢而自昔多鄧氏居  
之而鄧氏之題者文且藝者前後蓋相望也余生晚不能  
皆親薰而炙之今日於儂曰汝勵曰李文曰謙伯咸好學而多  
材而嘗辱友余元統甲戌之秋則又得深秀焉其氣廣以和其  
神清以長閱其所成名則曰吾素嗜陰陽家言也余曰子之藝  
其必精乎近世之業此者或負販之流子既有詩書世澤之遠  
以為之本而又有里居林泉之勝以助之養泊乎其中而蔚乎  
其外者非偶然也抑吾又聞雲林之山東連陝西接贛數百年

來以陰陽名世者不出於閩則出於贛今其徒交迹於東南數十郡間而吾子之居適當其中歲遇而月會之朝漸而暮磨之則其於斯術詳而不苟也審矣而余又樂於數夫鄧氏之多材且賢者而及交之也於是乎書

送曾伯明遊廬山序

至順癸酉之秋里人曾杲請曰杲也有千里之役將以陟匡廬浮溪淮竊聞古之相交友者其出處也必有言以為贈是役也不無望於執事者存嘆曰人之生也果可以不遊乎哉栖乎庭戶之中而恤乎塊斷之間其能自拔而不至於溺焉者幾希然有其志而無其時吾不得而遊也有其時而無其資亦不得而將也有其資而或不能不憂乎其後亦不得而遊也今子之年方壯也子之居有清溪修竹之勝環以壤土勤力其間無飢寒之憂子之親光潤之氣浮於眉頰子之兄弟皆足以力門

立子之子姪皆能以親師友若子者可謂有其志有其時無所慮乎其資而憂乎其後者矣子而不遊其將誰遊然則登車而攬轡蒼蒼乎吾之左右者孰非拔地之崖谷解舟而掛席浩乎吾之先後者孰非浮天之波瀾耳曰溢乎奇偉胸次無所滓穢則超然之思廓然之氣誰得而禦之它日之歸吾將有所驗也

贈于子中入京序

元統甲戌之秋于生子中來曰中非有他材能者不自意將為京師之役先生不可以無語我應之曰吾山澤之槁也何以語子、既不肯自汨沒於草萊之間亦可謂有其志矣有其志盡必有其用也吾聞之少年後往之氣離其嚴父兄而外者所當敬其身慎其言而已耳敬其身毋遊毋酤于酒遊斯荒酤斯疾慎其言毋妄毋佞妄斯憎佞斯辱矣方今取人之途甚多子苟

信吾言則將自有知子而揚子者矣子勉之

送張玉良入京陳言序

元統二年歲次甲戌十月邑人張玉良來曰僕也雖生長草澤然稍涉經史不肯自錄之昧之故凡政治之得失未嘗不關於心苟有所自信輒識諸牘今將陳之闕下鄉之先輩或辨義利以教我或指昔人之迂且狂者以戒我吾子獨將安贈余曰新天子明聖三公九卿百執事多賢也子所言者雖不敢請然吾聞振衣則有領揭網則有綱不得其領則顛倒而不序不得其綱則紊亂而不張是故志其大毋截於其細求其本毋究究於其末以百執事之所宜為者而告之三公九卿則瀆矣以三公九卿之所宜為者而階之天子庸非瀆乎是故膠於古而不通則腐趣於時而不任則偷方今朝廷采言者如恐不及亦豈有言之當而弗采乎亦豈有采之而弗行乎亦豈有行其

言而弗顯其身者乎吾用是有以卜子之行之不徒也

送道士劉彥基入京序

余見時見冲虛山中道士胡君可善年八十餘兩臉常如渥丹邑有醮祭必可善主之登壇揚言誦如撞鐘階披氅衣曳竹遨遊廊廡間可善也其下為張君毅可亦氣貌恢然實能嚴事胡張之下有陳仲達者涉經史又博通醫經識藥物療疾病良已年與余相若也而交最深每相過輒竟日窮宵清言有不知世累之自遠也胡與張相先後以老死仲達克世其業猶二君存時又其下為陳則虛魁然若不勝衣雖生長隴隴而諄諄惴惴猶溪山窮谷人則虛之下乃又得劉範焉範哲澤而長身趣向亦甚不卑亡何而仲達早世思見之不可得見則虛如見吾仲達焉既而玄教大宗師吳公置之幕下留京師且十年欲時見亦不可得苟見範又如見則虛也它日範忽來告曰範將

省吾師於京師余歎曰世固有親父母昆弟遇毛粟利害得失  
輒白眼反唇相視猶途之人甚者如怨家仇敵者何也無它重  
利而輕義也今子不遠乎萬里不憂乎歲晏聚餼糧犯冰雪凋  
零於羈旅之際蕩兀乎舟車之中汲汲焉遑遑焉唯師之求可  
不謂加於人一等乎與之厚者咸賦詩焉余得以推其好修尚  
義之所由來而又私不足於其性而朝夕無與遊且言也遂書諸卷端

### 藍田八詠詩序

藍田八境者闕道士則齋宋君之所名也君嘗創觀於長樂縣  
之勝地而居之而得額曰具元凡觀之前後衍沃而為田者曰  
藍田有橋焉曰藍橋因舊名也相傳古有藍氏主之又謂向居  
是者嘗種藍以染橋之南有仙人峯以其群山卑邪牽放而此  
獨超然若仙者之於世俗也又南有紫薇峯以是花多產其上  
也益南有青牛嶺東二里許有雙髻石皆似而名也然謂之青

牛者以老子嘗乘度關美名之安得如老子者復乘斯世乎北  
有逆龍嶺雲氣之所自出天苟欲雨則翁然歲旱土人於是  
為卜雨也又北而南為還源洞流之所自出也是八者皆宋君  
之所遊息而吾黨之士或詩之或賦之錙然而金石奏爛然而  
錦繡敷而未已也夫宋君學仙者也顧乃眷眷然於鄉井釣遊  
之舊何耶然吾聞仙者之於境也蓋寓焉而無所累焉耳苟寓  
焉而無所累焉則將必乘飛雲馭長風而遊乎八極之表而向  
以藍田之境為於斯時也其視吾黨之所云者又直夫塵垢  
秕糠而已矣作藍田八詠詩序

### 和吳宗師灤京寄詩序

元統二年夏玄教大宗師吳公從駕上都嘆帝業之弘大觀  
朝儀之光華賦詩二章他日手書以寄其鄉人李某且曰苟士  
友之過從者宜少之與其歌詠太平也於是聞而來觀者相繼

傳錄於四方者尤衆咸以為是作也和而莊豐而安婉而不曲  
陳而不肆其正始之遺音乎夫大宗師以出塵之姿絕俗之氣  
主朝廷祠祭之事猶不肯以終食之頃少忘於弦歌之間昔王  
季子始基也柞械斯拔宣王之復古也牛羊為群此其細事耳  
而詩人且雅之頌之仲尼亦存而不刪今國家之大際乎天而  
極乎地開經筵以 聖學設科舉以興俊髦向之馳馬而試劍  
者皆彬々然文學之士矣矧 堂之上百執事之中如召康公  
尹告甫者亦豈少耶大亨之雅清廟之頌宜其十倍於古矣於  
是相與鼓舞而饗載者凡幾人雖不足以希望盛製抑亦和氣  
之所形於草萊巖穴者然也遂書諸卷首

贈上官升遊京序

上官亞來曰亞將有京師之役不得朝夕見願賜一言以自警  
者余曰吾年運既往而業不加修而何以語子雖然吾嘗聞之

師矣君子之於自厲也莫大於先靜其心、靜則視聽言動皆  
得其正矣曰然則心無躰吾不得而執也心無臭吾不得而聞  
也果惡乎而靜曰寡欲而已耳曰紛々然接於吾之目者皆可  
欲也浩々然入於吾之耳者又皆可欲也亦惡乎而寡曰至聽  
無聽至視無視非為之為全神守氣由是而國有忠臣由是而  
家有孝子百祥具集諸福畢至內馳外滯徒以汨吾智而終吾  
世是謂天德之棄也再拜曰謹受教矣遂書以為別

贈何謙光遊京序

何君大方之子曰柄字謙光言曰柄將舟經平盧阜之陽浮長  
淮絕黃河遊邠魯陳蔡之墟而因以達夫京師吾子柄父之執  
友也其何辭以贈我余曰吾賤者未嘗習進取之方吾杜門未  
嘗更途旅之事其將何以告子雖然子之名字固有取於謙卦  
之義吾更為子申之若何夫柄也者所執者也謙光也者能執

夫謙下而道自光明者也天地之道謙也鬼神之道謙也人而不謙天地鬼神舉惡之矣天地鬼神舉惡之矣而世或猶有不謙者何哉見我而不見人也何以謂之見我而不見人也吾苟有一善焉其心曰我善是人必不善是苟有一知焉曰我知是人必不知是我長而人短也我大而人小也我多而人寡也夫如是則其聲音咲貌初不期于不謙而自不謙矣是故古之君子有聞言而輒拜者有克己以為仁者今而翁以是名子而師以是字子其愛子也深其望子也至而子則又能疊、為親師取友而不倦州閭鄉黨之善士而猶以為未足也將求之京師之會四方之廣守焉而弗失行焉而益著亦可謂尚志不自陸沉者矣在書亦曰謙受益它日之歸吾將改目而視子之容易耳而聽子之辭富貴利達蓋有不足言者矣

送劉則誠學錄序

余與覃懷閔君仲魯皆學於上饒陳先生之門先生歿去家維揚踰二十年不相見其神清以夷其質方以正其談經率詳明敷暢使人深聽而鄙吝消余維思之而駸：乎老態不能具舟命駕多見其不如古之知己者他日餘于劉則誠來吾山中預言家有別墅維揚得與閔先生游者再歲仲魯素風儀整然而則誠進退之礼殊有師法嘗見薦於淮東憲使得錄高郵儒學之官且有日州里婚交賦詩以餞而予序其端因予之曰吾子方以弱冠之年而得官於庠序之間上有博士以主其教下有賓叙以似其勞應酬之所鮮及會稽之所不葺當夙興夜寐資諸人之善而求諸己名之與業晉進而晉長其時有不可界限者也大江之舟先維揚而後高郵必當拜師門而行試以吾言質之何如也至正丙戌九月日作

送程用和序

至元四年冬十有一月餘干程君用和將游于京師李存聞而告之曰人之言曰漁必在淵獵必在藪是故志於當世者不老於丘壑之間動於五穀者不出於隴畝之外然則證明非自言也則國卿安得下堂而執其手審戚苟不和而歌則終於下里飯牛人矣是故信其有以自達也不必嫌於自前也况吾子敏而周通而不隨其必有所遇合於是行也乎目系之詩曰秋風起兮山葉黃歲且晏兮浩水霜子何為兮戒車航携束書兮遊帝鄉負修能兮遇明良時不可失兮雖古人其猶皇皇安得結佩兮相翱翔髮種兮徒自傷

送于仲元入京叙

信矣聞學之無窮也然吾聞得其正而無窮焉則愈造而愈深夫其正無窮焉則愈驚而愈遠吾嘗刻意於文辭詩歌竊自謂苟得彷彿於漢晉唐宋諸子者斯可矣及獲師友之講明遂朝

夕之循習而後知古之人業莫大於盡心而知性盡心而知性而後通於天地萬物之情通於天地萬物之情則言語之際有不求於文而文者矣方將願於有為而未能而人則達以爲非好尚不同何足恠也嗜屠博者不近於正冠納履之流喜優獵者自遠於負耒荷鋤之輩勢則然尔昔有五人同席而酒者其一人甚不嗜也問之故則曰吾憂夫渾神散氣而事不治也又慮夫漸胃漬鬲而疾也又恐夫傲、媿、而人夫所瞻入也四人者初相與貌咲之及則愠生焉又及則黜之其若歸他日酒惟恐斯人之在嗟夫求是非於世俗之下亦奚以異於此生徒干有興雖迹於老氏之門而毅然不以爲非事物之來苟有一毫櫻乎其心拂乎其氣則必相與洗濯剝落以求庶乎正焉而未已者又將往侍其師而爲京師之役數千里之間風氣之殊山川之阻已有以異於乎居几席之安而增益其所不能者

多矣矧夫今天下為一土宇之大生息之蕃開古以來未之有而士君子生斯時者禮樂教化之所及且皆寬通偉博磊落俊拔者也且京師人物之都會而有興之大宗師張公則歷事四朝恩遇不替而有如其嗣師吳公則隆厚於親而尊顯之又推以及於戚姻鄉黨朋友亦無不周且悉焉詩曰庶幾夙夜以永終譽又曰孝子不墮永錫爾類其二公之謂歟今有興之行內取則於其師外取友於天下所以陶成其美者備矣他日歸動乎容貌發乎聲音吾將明目而視傾耳而聽之為若天面私便而尚紛華則決非好古者之所為又奚必煩言而瀆告之也

### 送楊霆發序

五嶽四瀆山川精氣之所萃也而衡岳獨鎮大江之南去海為最近國朝以來益嚴其祀而崇其神未嘗有巨浸赤地千里之憂且山之中半為浮屠老氏之棲者非一而所謂壽寧宮者境

愈勝制愈宏寔岳神之所安也朝廷歲時祈報之使往而踵至是故居遊於其間者率魁竒焉至元丙子之歲臨川道士楊君霆發以素有道術一日為其邦君禱雨輒應由是捧其主教大宗師之檄知本宮事將行其弟子楊當請凡郡之名能文辭者咸詩焉當嘗從余遊而徵叙言於余也余聞古方外之士其神凝使物不疵癘而年穀熟揚君豈亦慕而為之者歟禱祈之效固出於邦君之誠亦其精神之所感也今則又與於衡岳祠官之次雲霧之所蒸潤風雷之所通暢變化在於俄頃影響見於眉睫欲暘而暘欲雨而雨則其及於物者不更廣且易乎若徒曰會計出入於簿書之間如俗有司之為者則未矣揚君未必然也

### 送張自質序

余與宗人同叟幼相狎也稍長同叟著道士服龍虎山中不相

見者動十四五年同叟得清靜之境其文學曷為以進而予則徒汨沒塵埃以老每用愧於同叟也他日以書來數其友張自賓之賢且將遠遊頗有意余文之未幾陳汝欽亦其山中人來臥疾余俟庵自賓一日有書問之竊觀多責善之辭汝欽因謂自賓家在江之右父年八十而康強書無所不讀自賓之居山中也每得其家帖未嘗無規勉之言余益信自賓之賢蓋信自賓之賢蓋有由來自乎同叟汝欽之與之也夫龍虎多賢德多材藝後來秀懋問學而考業裕乎其有人哉而自賓又得家君之嚴有栖息之安有遊覽之勝有切磋之地過乎人者多矣而又欲徧歷名山大川之間庶幾乎未見聞者然則自賓之所自廣自成也其孰得而槩之願予言足為自賓贈亦聊以謝同叟并以勉汝欽云

番禺仲公李先生文集卷之十八

番禺仲公李先生文集卷之十九

序類

送王伯達遊京師序

余嘗遇臨川王子伯達於河圖山中伯達賦詩以相好予老退愧不能和也他日伯達過予謂將為京師遊時春雨初歇草木明茂予與伯達登覽乎山水之間徘徊乎壠丘之上頌當世之設施論古人之製作相頌以樂信而後別伯達蓋吳先生之門人也其始冠先生字之而又為之說其聞見也固博其講貫也固詳而是行也蜀郡虞公序之南豐羅子序之虞公賢縉紳也而羅子亦東南知名之士也其文章譬之於車或推之或輓之名之彰而身之顯也無日矣於是乎書

送吳景漢赴寧國儒學正序

學之有正者何曰正不正也謂之學已猶有不正者乎曰去古

遠也夫學也者教也養也古之教養也一今之教養也二何以  
二曰教則弦誦是已養則廩給而已耳廩士之有田而無力役  
粟米絲纊之征古今所同也無力役粟米絲纊之征則其食之  
也安食之也安則其習之也且有成然則今天下之名為教者  
大都有三焉儒也釋也老也彼釋老者有田而無征與儒者同  
而儒者之出納則刺史縣令得以稽考之部使者又稽考之小  
有不當則黜罰行焉彼釋老者有司未嘗過而問其故何哉曰  
儒者所自取也非有司之過也儒向以自取曰彼釋老者雖曰  
方之外其流猶或未盡私之也至有乞貸以營贍者又安肯私  
其所固有也乎然則儒獨盡私矣乎曰儒之私也久矣其有不  
私者幾希是以見薄於有司也孟子曰仁者如射：者正己而  
後發：而不中不怨勝己者反求諸己而已矣友人吳君景漢  
嘗教諭桐廬分水二邑已今將往正身之之郡厚矣吳國者山

川之秀古今材德之輩相望而出而又有憲府恒臨蒞之賢公  
卿大夫日督而月勉士氣之盛豈有不正者乎而需吾子之未  
也吾姑發其設是官者之羨於諸君子贈言之端以別之而并  
欲吾徒之自反而無久為釋老下也吳君蓋家學其尊人嘗種  
松耶外以自居學者尊稱之曰為萬松先生云

### 送子初饒旭序

余方遊碣石仙岩間臨川饒旭子初自倪陽來會請曰旭年三  
十有五矣師童子句讀者且十年甚不自益也有晉寧張先生  
仲舉者絕聰明經史百家言過目輒成誦發為古詩文一操觚  
可數百語不休其才力過人有如此者又聞有甯懷閣先生仲  
魯者通經講析詳明御徒屬進退禮節甚辨以嚴苛失過不少  
假借論古今事雖王公貴人之前無所屈其氣象矧方有如此  
者又聞有浙東洪先生伯堅者年甚高朋友在千里外時以書

續問辨凡先儒理到之言猶搜購手自抄帙其嗜學有如此者  
旭皆願往見之庶幾益聞而益見乎余喜而謂之曰刀不利不  
可以割木不斷不可以材水泉之流者腐蠹不能生也種植之  
耘者草蔓不能沒也今吾子舍其近取其大山川所生國家所  
養者蓋芻然也吾子行乎其無若吾之孤陋寡聞以老也乎  
遂觴酒而別之

臨川戴氏靈秀庭詩序

去年秋嘗客臨川城中戴君聖田續其家庭所生灵芝來示余  
學士虞公以其父諱庭芝也更名灵芝為靈秀且賦詩云其郡  
及劬郡之士皆賦之吾聞古今天下之間福禍之兆甚微故瑞  
異不常見而君子貴知幾為其禍也自修以弭之其福也益修  
以將之今靈秀之生戴氏者既華於初年復茂於明年其出於  
先世積累之所形其亦聖可之身之所致也聖可苟不求言則

已求而無益於聖可與不言同蓋美生誇生喜生墮生  
禍也未若戒生惡生疑生懼生敬生福矣然則培之  
以禮讓而溉之以平恕使嘉積之氣常蘊而不泄則吾見靈秀  
之所以瑞夫戴氏者無窮期已因書以為靈秀詩序

贈王聖從序

夫醫工之最難者也余嘗謂其精粗姑未論其心則萬不可  
不仁也相傳盱江黎民壽氏雖高舉夕不宿於寢平居若亦小  
兒若生姜大棗若炭必甚蓄昏暮有扣門者輒起而藥之祭其  
貧則問曰家有貧藥兒乎或曰無有輒與兒有姜棗乎曰無有  
輒與姜棗有炭乎曰無有輒與炭日未晡則從一奴負藥一囊  
徇步城中病而貧不能謁醫者輒診而藥之雖寒暑不輟也上  
清道士劉伯全為余言今江陵有彭漢明者其所為亦多類此  
嗟乎豈獨昔之人為能然今人亦或有也臨川吳嘉善上饒葛

良範皆儒而通于醫嘉善病痢飲大黃遂不起良範病瘧亦飲大黃芒硝遂洞下膈痞復調痰咽芫花大戟益下而卒夫痢多暑毒腸胃注用黃連清且厚之大黃非所先也瘧為少陽邪而治以陽明痞虛復攻之惡乎其不斃歟當二子之自藥夫豈無持難者余甚寃之使天少假之年少更嘗亦必精王聖從亦以毋多疾而攻於醫春秋之義尤所當慎也他日過余其氣甚邁往故舉夫黎彭氏以勉之而復以吳葛氏戒之其不知言者將以余為無所張於聖從其知言者必以余為忠於聖從者也於是乎書

### 送吳文明序

元統元年冬十月陳昶初來春正月吳伯儀來夏四月張玉良來五月甲戌吳文明來皆將為京師遊而徵言於予也余日以衰老每為文或累歲時不能成况京師縉紳先生之林言又豈

可苟然吾聞言不徒發有其事而發也才不自出有其時而出也三代之際詩有采芣之章易有連茹之辭今天子春秋鼎盛樞善如流安仁十室之邑耳不數月走京師而謁文辭於吾者已數輩其謁於他人而行者吾不知也無所事於文辭而行者吾滋不知也夫如是幅幘萬里之廣表禮樂百年之薰陶岩穴之間行義之士其有不欣欣然而起于焉而行者乎蓋可以吾邑之小而例之也因文明之有請也於是喜而有言

### 送饒孟性序

醫家祖黃岐言尚矣近河間錫氏獨發明元害承制之義引喻取譬一何奇哉誠前人所未道且謂疾夫人者率風寒暑濕燥熱六氣尔而熱之用怕十九治之惟汗吐下三法也其徒張子和氏推用三法譬於勝敵草薙而禽誦之不遺餘力夫人之身真苟有虧邪斯人之善為醫者去其邪而已矣邪去而真者固

自若也然則醫豈吾所敢言也乎察於六氣而畧於七情非全  
工也知湯液醪醴而不知針灸非全工也詳於襍候而疎於脉  
理非全工也氣上而取其下不可以言工邪在骨髓而攻其皮  
毛不可以言工况時有升降稟有弱強風氣不同服食亦異嗜  
欲有淺深疾疢有久新其可一施之乎使二子者身為之見之  
明用之當如合養而啓鑰祖述之者亦豈能皆若是歟或喜其  
用藥果敢無留難也又或喜其簡易無所事於他說也前乎此  
豈無專門名家有如神中之之治哉若陽虛失血止以乾姜臍  
冷作祕通以硫黃下虛卒中涎湧者丹石壓之洞泄不穀欲脫  
者火艾灼之諸百損補以鹿茸薯蕷脾敗腎虧溫以附子川椒  
其法亦豈可盡廢哉是故思之不可以不周否則忽而易之也  
講之不可以不博否則拘而不通也專於攻伐者或真氣與邪  
奄忽而俱盡專於持守者或諸道填塞長病而速禍故曰天有

四時寒暑迭用地有五方高下隨宜肝江饒孟性儒家者流而  
游于醫又年方壯搢紳先達靡不造詣其能博通貫穿而克臻  
於大成者也然吾又聞河間所著凡十餘書顧所見者蓋一二  
云

### 百行冠冕詩序

自采詩之政廢而詩之美刺以微晉漢以來非無作者往往有  
以分其情性之正而終不能粹然一出於古融堂錢子生於宋  
之叔世取昔之考者忠者而贊之以詩而心以為是二者百行  
之首也遂顯其詩曰百行冠冕詩錢子有道之士行於家者固  
不待論而不及用於時使其苟陳力而就列則其所贊即其所  
行者也是故郭巨之埋兒有以惜其所蔽叔治之泣杖則有以  
明其同然秀實之揮笏威豪之嘔血雖出於憤烈而謂義乃有  
所未安知本之雍順子華之叩頭雖陷於盜賊而見理亦有所

不可泯孔褒之爭死則貶其未知倫理之輕重王導之勸謝則  
斥其位居元老而柔邪是皆所以引人反求諸己者嗚乎此豈  
徒模寫物態流連光景尔哉上饒陳先生獨愛而編之日與諸  
生誦詠之先生雖布衣而慨然以天下人心風俗為己任嗚呼  
先生之心即錢子之心也臨川危素又板行之聞者見者皆從  
而欣助之：人也之心也又豈異於先生者耶僕有以知是詩  
之必將家傳而人誦之也使家傳而人誦之夫豈不可以少增  
天地之和而近之言詩者或襍興而亂恐其於此未必不知嚙  
蠟然則如天常民彝何

趙舜咨海南海北還後序

至元六年春三月海北海南道肅政廉訪司書吏趙良凱舜咨  
驛載其母夫人之柩歸葬信之貴溪往年舜咨補晉康府從事  
輿夫人以就養僕熟知其慈孝為文以贈之今聞在廣海也

凡察友之卒貧不能衣棺者衣棺之妻奴之庸于人者贖之骨  
不能歸者歸之夫如是可謂善推廣其慈孝者已今則終喪行  
即事為僕因請更推廣者夫嶺海要荒之服其人憊而暴其俗  
樸而悍無外部告訐之長無他土變詐之習一有拂于其心輕  
則相殺傷重則首禍亂更其土者在于畧小過存大跡安之而  
已耳不然事或起于毫末而有傷于國體者風憲朝廷之腹心  
百司庶府之紀而生民之命繫焉舜咨從事其間旦暮在賢公  
卿大夫之左右非若草茅常布之賤望之若雲漢然者政有不  
安于心守經術之正操觚抱檟懇：而開陳之毋深文毋貨獄  
深文則枉情貨獄則冤人一有剽劫嚴軍于要害勿輕用士卒  
犯瘴毒爭溪洞之險趣斯須之利其諸要害之氓宜使自為卒  
伍復其身授之刃而教之戰立斬敵之賞避敵之罰賊至則兵  
賊去則農也購募而有功者必重輕爵賄之勿失信勿因以為

帝使海隅教十里之間老而幼暖而耕涼而獲吾則愉乎  
乎祿于其土求其物產之美而春秋薦獻焉亦豈非慈孝之大  
者歟

和吳宗師眼明識喜詩序

大宗師吳公有目青者數年他日得善醫復明喜而識之以詩  
又他日書以寄示其故山於是和之者甚衆集而成卷而僕得  
序其端焉夫目之用在矐子耳由其所受初之氣上出而精明  
者也然世降久矣人之生也率五十而衰蓋津潤吾身者日以  
耗僕年未四十時平居常若有繫然過眼如黑花其讀書字  
如麻豆大者才數行輒欲少暝休而後可再觀焉甚矣其早衰  
哉昔孫思邈氏有言人目昏苟收視三年則益明雖信之慚不  
能行也大宗師公將八袞矣猶善飯愛人之心森乎未已今  
也若雲霧際而日月明亦豈非其中之所養有以大過于尋常

萬者乎且其詠歌以自喜而人為之喜也

贈李叔陽之延平儒學錄序

國朝之取教官也往以直學為之基教也者喻諸道義而成  
人之有造也教於一邑則百里之子弟賢不肖係焉教於一郡  
則千里之子弟賢不肖係焉實甚重事也而直學蓋出納之吝  
者夫出納之吝雖負販之子可能也雖昏靡之子可能也果向  
以試其才而俾之師夫人乎吾常疑焉宗人叔陽年甫壯學于  
家而聞於人御史薦之由是捧帥府之檄錄延平郡之儒學將  
行士友咸賦詩以餞所以譽勉之者亦何其藹然也因謂之  
曰吾子之得參教于彼也似與宿昔進者不侔也雖然立賢  
豈有方乎莞庫可舉也魚鹽可相也顧其人何如耳况延平之  
為學先儒之流風未遠也錢谷之筭既不及于子迎送之勤又  
不專在子事有非是者則明目張膽以糾之藝有工拙者則月

較季攷以勸之夫如是濟乎其底於有成也者必矣叔陽實甚美工於詩又善鼓琴云

贈臨川劉孟中彈琴序

余少時亦嘗學琴粗能二三小操顧窮鄉下里最難得絃遂爾廢忘然終未能無情于此也向天冠山中祝練師丹陽惠余一琴咸謂可寄指有損破近上清道士鄧子方為修意老去無憊時或稍尋繹也古聖人製琴瑟為可以養吾中和焉耳懂往來急惰跛倚者不能鼓也孟中馮憲士好之不已必將有得於鏗然之外也

送祝蕃遠赴潯州經歷序

至正三年秋八月上饒祝君由湖廣省掾史經歷廣西潯州路之總管府其門人曾某請夫能詩者皆賦之以重其行而命李某叙其卷之首某曰吾聞嶺海之間其土地沃肥其物產蕃夥

其民愈而顯其風悍以輕古今必擇才有德者以臨蒞之畧小過而尚大体因其俗而為之理也苟以為要荒之服而鄙夷之則非矣夫熊席至猛也桡而調之可使與人搏而嬉也禽虫至蠢也食而教之可使為人役也况我朝禮樂教化之所漸被殆百年于此而其地之名人秀士亦往輩而出今祝君又以詩書之習而為一邦案牘之長然頗聞案牘之間情文不相稱者有焉夫情文不相稱則誣則民玩民玩則易犯法易犯法則獄訟繁獄訟繁則聽斷或有所不詳聽斷或有所不詳則人不服是故春秋之義在于刑賞得其當焉而已矣祝君蓋有孳之士而同門之先達毅然願用力于當世者而明友則又有相贈處之道故輒因是序焉而以規

送楊顯民遠游序

君子之游處也惟其時義而已矣昔者孔子自謂東西南北之

人故輟環于天下求夏之時商之坤乾而之杞之宋觀延陵之  
葬子而往羸博之間也善子產于鄭知邊伯王于衛主司城貞  
子于陳南之荆北及農山西至于河凡歷國者七十餘是皆明  
王道窮羨利之辨進德修業雖老而不休然則吾黨之將者苟  
不志於孔子不如其已也或謂彼大聖人也無乃欲延跂而及  
于天乎雖然亦吾同類耳不于此乎學而為學豫章楊君顯民  
將浮秦淮歷齊魯之墟適泰山拜孔林而迤北至于京師其郡  
人胡君柏友倡為詩歌以餞贈之所以獎勸之者甚盛方今朝  
廷清明海內為一政治之或有未盡合于古者膏澤之或有未  
盡下於民者草萊布衣之徒雖無其位皆可得而言也矧楊君  
年已逾五十而學亦既成章矣其遇否其通塞未必不素定于  
其中余復舉夫古君子之將之羨之尊且大者于其卷端益以  
相勉云

贈徐伯翰序

夫衆人之行役也非或由於干祿則多出於逐利則亦何貴乎  
人言之贈必也知其所不足思其有可益而後求其入而為之  
言此古今之所同上饒徐震伯翰奉：然欲顯其親之有善去  
年秋得詩於學士虞公既又得法書于陽撫州今則又將浮彭  
蠡而過秦淮或由天河之南經泰山之下望孔林而走京師以  
其嘗從余游也而復欲余言以自厲夫古今天下之為人子者  
孰不欲顯其親之有善顯其親之有善羨莫先于修已然亦有  
因循而不果馳騫而不暇則亦終於沒：焉而已矣今吾子凝  
重而不浮詳默而有幹是行也其所承事非常世之顯者則四  
方之聞人瞻其儀槩聽其論辨稔其懿行洽其政事其有以益  
乎我而成乎我者度不可以驟也夫如是則亦為往而非顯親  
之善之羨也乎

贈陳彥清序

士之欲不汨：乎生者必當出而游也。象庭之間沒，以朝夕  
閤巷之途忽，而少老焉。上饒陳穎彥清謂將游乎四方，其郡  
人祝君蕃遠為之叙。余既而讀之，亦何其渢：乎強人意也。彥  
清靜明先生之家孫也。余獲師事先生，先生之至誠有以深感  
人，先生之強力有以過乎人。余蓋下邑之鄙習者耳，非先生其  
終小人乎。先生沒，今十年于此矣。見彥清如見先生，為顧當以  
先生之語余者語彥清。今則苟非千里而近，則將萬里而遙矣。  
惟彥清思其先祖，思其執友，儼乎其在上，恪乎其側，勉：乎  
其弗自己也。楚：乎其等也。抑而非靡也，廣而非肆也，順而無  
所隨也。夫如是，縱未得於其外，亦將無失于其內者矣。時之求  
才人之取友，舍是而謂有他道者，吾則未之聞也。

山暉堂詩序

山暉堂者，里人艾君元守之所作而學士虞公所命名且為之  
記者也。初元守墾其居之隙地十畝而圍繚以松竹，益以墳  
壤，移名花致奇石分畦而縱橫之，而桑柘菓蔬鑿池而淺深之，  
而蓮菱菰蒲既成，或携鋤抱甕而無所於休，或觴豆賓客而無  
所於陳。於是復構屋十有八楹，其間而後朝莫晴雨寒暑食息  
去留而無不宜。由是邦之士友及四方之播紳咸嘉其志美其  
名而賦詠為傳，而誦之皆和平安樂之音也。吾嘗謂世人之情  
易縱而難足，豈不曰身外之物可意而取也。是故貧則欲富，既  
富已而又欲其身之貴，既貴已而又欲父其生由是而顛倒其  
智慮勞役其骨筋，殫其委積忘其遲莫而不知己者比：然也。  
今元守之年才四十耳，承先世之遺業不營而自大舉明時之  
教令不戒而自安，有昆弟足以持門戶，有子弟足以備使令，無  
怨惡於里閭，無怵惕於朝夕，日出惟園之往日之入由園來。

也亦可謂優於持盈達於涉世者矣且夫和平安樂之音盛則  
奔趨覲覲之習息奔趨覲覲之習息則人之於生將無不遂其  
理矣然則遊觀之所燕樂之事其亦烏可以已也夫

贈曾文哲行醫序

疾病之於死生亦甚大矣而吾則以醫適司其壽夭焉苟未授  
以匕劑則生死蓋尔也勺合下于咽生吾生死吾死矣可不慎  
歟或曰無乃識之未至辨之未精更之未熟故為若是憐然  
乎曰譬之于兵：危事也昔李廣將律甚畧疎然未嘗遇敗程  
不識夜擊刁斗治簿書及明亦未嘗遇敗然則寧為程不識毋  
為李廣此余每欲為業醫者言臨川曾文哲以詩禮之餘而頗  
好方因書以遺之

弋陽縣阿里公宣差詩卷序

至正四年之秋西域阿里公受命于朝來監信之弋陽縣公世

居燕南以孝友稱故御史季公某學士賈公某叅政蘇公伯脩  
郎中王公某或詩以美之或文以紀之前乎此嘗監之膠水  
有惠政其民述而刻之石今茲益以是理未幾而邑人歌詠之  
者復盈耳而載路顧安仁之於弋陽也壤地相接聞而知之亦  
有不能已於言者桂君才甫集而次焉何其志之似弋陽也由  
其風於人者易而速故其形於音者皆諒而和論語曰惟孝友  
施于有政其阿里公之謂矣

送徐學正赴靜江序

至正甲申之秋八月郡人徐君繼安捧廣西連帥之檄將往正  
靜江之儒學以書來曰僕與子生同郡也子之言贈夫人者多  
矣顧僕適有茲役勉其所不逮資其所未聞豈獨新於僕乎敢  
以為請且四方之先達亦有以教我者用繕以俱余讀而愛之  
若廬山杜君其會稽潘君多吉同郡楊君階翁皆佳作也信乎

君子之有所譽處乎然吾聞儒者之道正己而人自正初不在於求正之也且是非之不辨也久矣正其大母及於其細正其心毋屑於其跡可也矧庠序之間于洋者皆冠服儒也其所誦說皆孔子也今子以考友之資逾壯入強艾之齒一筮仕而官則文學職則糾正地則文在海隅淳慝之俗夫如是荷其實而不為虛位也必矣

贈長湖寺文上人序

安仁之南有寺曰長湖其棟宇歲久且圯頽僧食無贏贏不足以役土木不免勾財於四方之好施舍者而膏之至正甲申之秋有文上人者將曳錫持鉢毅然以為己任且行翰林倪公疏其志復為文以寵之其所以稱道上人者既甚詳且信而復來徵言于余吾聞四方之風與人之情其嗜好亦或有異吾徒手而財於人有得有不得矧山川旅瑣之况飢渴勞苦之情惟其

忍乃有容惟其勤乃克集事惟其公乃獲施者之樂舍是吾無以告矣于是乎書

送鄧子方遠遊序

上清道士鄧子方屢以書抵予謂將遊乎四方而需予言也余曰夫士之遊者非一端志於功名富貴者豈待輕重於吾黨之空言志于貨殖者則又何俟于言故諾之幾月而不能措一辭子方豈不以予為有難色也乎蓋余之言夫人之遊者亦多矣使其羨同言所以不再其語熟文不足以行遠矧子方既不為功名富貴遊也又不為貨殖遊也然則苟不求高人勝士縉紳博洽以新長其聞見是為徒遊子方神氣潔清為名族之子為良師之徒又能吟詩能鼓琴能寫竹石且有道術能禁妖怪已人疾疢其必有所遇合而及于物而不為徒遊也審矣

番禺仲公李先生文集卷之十九

番禺仲公李先生文集卷之二十

序類

送魯志敏北遊序

樂平魯志敏甚好作詩嘗遇余出其編余讀之有以溪見其工且勤也它日又來曰吾將泛秦淮過黃河東登泰山北走京師庶以昌吾詩乎余喜謂之曰文章之高下蓋係其志意之小大志意之大小又係其耳目之廣狹方今六合一家光嶽之氣全政教之具修子能不遠萬里用寒暑之變更歷山川之夷險其間人事之可喜可愕足以恢弘我警戒我者則亦何限矧今播紳之在館閣者皆極天下一時之選又能求而親薰之是則承乎松栢近乎芝蘭者必將浩：其膏中源：其筆下如出雲如涌泉如玉之有輝河之有濇遇之不可修之不及其有不期然而然者矣因舉酒為別且曰子之歸吾能候子於泊水之陽解

其裝讀其詩或不如吾言有如此酒至正辛卯七月作

薛玄卿詩序

上清外史薛君玄卿林下之秀敏卓犖者也早工于詩四方傳誦有集學士揭公曼石為之序黃公晉卿復序之僕亦嘗以數語題其後君之居山也名人勝士來遊者未有不與之尊俎傾倒且以翰墨相歡而去他日忽手足左痺不用僕候謂之曰夫造物者其欲廢我耶吾從而廢之若我何苟不肯廢其所廢是獨欲述天者也述天者謂之病既而葺其以風日清美時輒肩輿造鄰室遇酒必醉遇飯必飽且賦詩為行中書曰喜曰其無乃能自造于安順之城也乎吾笑疾哉吾固瘳矣又他日痛飲而逝其言行其先世其州里其卒矣其錫命於朝而主名山川之祀事自宜有搢紳先生之素者書焉而其郡人張率孟循復賦詩以哀惜之而同賦者若干人余因得以叙其卷之首至正乙酉

贈李志堯序

余之姪志堯製煉諸品丹砂其法蓋得之于趙養真先生先生奇偉磊落人也幼出家著道士服多伎術尤善製煉金石以療夫疾患沉痾者是以志堯北面而師承之古今天下之間大而理道細而巫醫百工皆貴于得所授受今志堯可謂得所師矣雖然無苟成必也備材而擇良無強售必也有徵而人自求蓋人將以信其師者而遂信之可不勉歟至正丙戌三月作

贈姜永吉學醫序

臨川姜永吉來問醫於余：嘆曰子之郡中及傍郡以是名家豈少余道聽而不習於故況采而不由其統應于人中者或一二而不中者恒八九顧予安足問哉巫醫百工雖非士君子之所先事然皆道也象山陸先生曰主于道則欲消而藝進主于藝則欲熾而道亡藝亦不進今永吉儒家而不貧其所主者庶

絕多于道乎吾姑與永吉商確乎此可也况醫者人之司命宜  
安雅宜詳仁勿趨視而易勿駕言而輕其立志也欲堅其培基  
也欲厚則不患其不成矣

至正壬午  
秋九月作

### 王伯衡詩序

其年王伯衡由國學積分就試禮部登第擢為太常禮儀院郊  
祀署丞明年某月將之官鄉里之姻交咸賦詩以榮餞之上官  
友蕃集而成卷因為序其端曰署丞者古春官宗伯之屬尊神  
明嚴祭祀帝王之首政也故凡公卿與執事于其間者率隆  
道德而取詩書今伯衡以方盛之年習于成均首擢禮官出而  
為劇郡大邑能不忘恭敬而和其民人吾知禮樂之林所由來  
者也

### 安仁訟決詩卷序

詩之有美刺由其事之有是非也然孟子曰詩亡然後春秋作

當是時亦豈無詩哉美刺不當雜詩猶無詩也其處趙公天琪  
來丑安仁逐吏卒之濫入者不得跡于公庭葺館舍之係官者  
不以勞乎民力往役之籍拋之而弗搖寂寞之士禮之而不忽  
同僚或忌之回其囊隙之微而適有疑似之端聽譏邪之說而  
成傾覆之謀遂備大訟逮繫數十人院數月而未決無何而新  
太守下車而是非較然以明邑人之能詩者皆欣：而同賦累  
數十篇未已也僕聞意苟欲傾夫人者必先自傾者也人之言  
曰出乎尔者反乎尔苟遂吾意大失吾心况其有不遂者乎是  
故信道之君子不問于高卑貴賤必當先正其心：正則意不  
妄起位乎民上則哀矜惻怛亦何敢竊國法而輕重市利之又  
何敢不欲于己者而施諸居乎四民之中謹身節用以服事公  
上亦何敢持議吏治短長故曰官者無失其為官也民者無失  
其為民也故貴者敬其位而安賤者敬其身而安上下相安則

禍敗何自而作今上仁聖無終食之頃而忘乎四海之民選擇  
於千一而韓侯來泣吾饒不旬日而舉措如此其公且正吾饒  
之人亦何幸歟且是詩之作也有慷慨奮厲之音無怨懟迫切  
之氣吾將見大夫之政成邦君之教敷而一郡一邑之俗日歸  
於和且厚矣於是乎書

跋彭南溟行卷

繪人之形似者世謂之傳神吾嘗笑曰神無方果可得而傳乎  
天地萬物皆傳吾神者也何事於丹青或曰寫真又笑曰真果  
可得而寫乎苟以此為真則所謂偽者安在南溟彭君業是使  
遊江湖名勝間蓋有年他日過余又笑曰苟如吾云則子之伎  
將不售矣古今天下之間有功業於一時有道德於其躬有惠  
利於無窮而為光使人不能忘者則人思之思之則願見之願  
見而不可得：其肖如親薰于其生若然則丹青形似是亦不

可無者也

至正丁亥  
十二月作

舒氏族譜序

邑人舒陽東賓增修其族譜持以過余因謂之曰譜之脩尊祖  
宗序親疏辨隆殺右賢德述貴顯詳昏嫁嚴死生尚敦睦此古  
今天下所同說也興替不常世固有乘軒服冕之家不旋踵而  
輿臺皂隸者耳舒氏居渴石下將十有三世矣雖無赫々於其  
前亦無栖々于其後世復有能修其譜而亦有足書者焉斯亦  
可以為美矣善姓大族何地無之不幸而有不肖者生則執筆  
者將恥書彼亦或懼不得書然則譜亦不為無助也乎

至正丁  
亥四月  
乙酉  
作

張伯遠詩集序

僕見時聞諸父間言伯遠能詩其後侍於父貴池公誦其古意  
卒章云萬里有征人九泉無戰國夕塘觀潮詩卒章云死不

子晉生當隨范蠡時雖不深解心竊以為好也稍長頗亦從事  
乎詩相過必劇談終日至夜分不休或聞鷄而寢或東方忽白  
竟以不復寢也伯遠每曰詩之流固尚矣而世之言詩者孰不  
近曰李杜往、隨声而和逐步而趨今吾之詩非不以李杜為  
師然非李非杜殆吾語而已矣不知者以其言為狂誕知之者  
蓋信其漫有所自得也故其傲古多溪沈不浮其大篇多豪蕩  
变化其律多穩順切實雖出於資過乎人抑亦平生盡力窮神  
之所及歎間有所自喜自許者直謂不敢多後于古人而人亦  
不以為誇至或分題賦物非傷于巧則病于淺斯亦其放浪以  
詩為諧謔然也其仲子所緝為若干卷傳之四方宜有賞者僕  
不足以盡知之也伯遠於人文章評論取許最公雖子弟日課  
苟有一言之善輒記臆稱獎不已他日相見或先為誦之又  
能倚通陰陽家言惜乎其老死於丘壑而無所遇也伯遠姓張氏

諱立仁世為書易詩書家云

送高希顏入京序

余見音亦頗志於遊嘗慨然慕司馬子長之汗漫既冠家甚貧  
親且老遂汲、於旦莫而不免為童子司讀師因自歎曰造物  
者其措我乎父之而親益老且病憊、焉不忍一日別膝下未  
幾而吾髮種、而吾目荒、嗟乎今吾親則既沒矣向之種、  
者化而白矣向之荒、者甚而為空花矣由是則苟有告吾以  
逝者則必欣然為之言上饒高子謂將污錢塘踰大江而自達  
夫京師華一言壯之予曰子之行宜矣親康健而家粗給也且  
子年甚少於我也子之才甚通于我也年甚少者後不勤才甚  
通者通于用是行也其將有所遇乎其將有所遇乎

送朱元善序

夫尉於一邑雖未僚責頗重向者作姦犯科之民尉職捕而聽

其初辭初辭而情則其刑也不寬然古之人不貴于得其情也  
貴于禁其為非者也尉也者職最專于民為最近非禁其為非  
者以吾嘗謂苟有竊雞狗之微者吾必甚痛之是教其不敢竊  
牛馬也平居無事之日勒群牛賁扉履旗幟設而不張鉦鼓具  
而不鳴厲戈露刃橐弓矢以耀境上使見者怵然聞者惕然向  
金華胡公長孺判奉化州時至則籍其善盜者他日召而詰之  
曰吾聞若不耕若不藝若不負販不庸若何以食父母妻子乎  
懼之以律開之以善或為假貸富室使生息之復曰若不吾從  
苟有失吾必意若吾先問若矣是蓋保全暗愚之義也况今詐  
偽日滋尉亦豈易能哉彼固有怙終者有劫脅者有誘者有饕  
且偷者有飢寒者彼死正安所恤哉士君子苟得位且盡心焉  
善刑之善不若善防之善防之又善導利之臨川朱君元  
善以其先公之澤尉南易府鎮平縣元善蓋世鄉之子孫而資

又好方常已其州際鄉黨疾疾者必其心之慨然恤乎人也與  
以方己人不若以政正人也抑吾又聞河南北之盜善騎射出  
沒大川廣谷間或偽軍行歷邦邑人疑不敢誰何又非若狗鼠  
為也今朝廷法令嚴安有是設有元善或弭之或執之其方畧  
必有素矣里人俞芾其壻也集江東西之賦其行者無慮數十  
首而請予為之序予知元善之個倘也輒以平日之欲告夫人  
之為尉者書諸端云

賜養晦針灸序

醫之道針灸為最上邪之所舍可以立出豈必若湯液多而大  
劑歟：飲乎余嘗願求天下之名針灸者而受其法歸而施之  
於農圃細夫無以資夫藥食者於己不費於彼速已然駸：而  
老不能償此願也余于紫雲山中道士方養晦初得法于天台  
桐栢宮沈君既講明于漆園羅君辨經絡之始終論氣血之盛

哀為甚詳猶以為未足將復遊四方求賢于己者即而師友之  
嗟乎人之于藝不責多所貴者精也養晦之所能已州里之所  
鮮能又欲徧參而悉究慙乎而不精用之於貴富故有以報施  
之農圃細夫無以資夫藥石者顧吾願雖不償而為余償者未  
必非養晦也

送東山寺昭上人

至正辛卯五月丙辰作

臨川東山寺昭上人謂將浮彭蠡登巨窟遊會稽天台過庾嶺  
入巴蜀願賜二言以自厲余老且病不樂于言語文字又安然  
頗聞浮屠之遊顧其立志何如耳苟以為吾既削髮方服離親  
戚絕嗜欲逃幽閒所以樂其教也樂其教則思所以明其道明  
其道則必求其師與友求其師與友或以州閭鄉黨為未足然  
後奔走乎四方名山大川之間犯寒暑忍飢渴勞筋骨歷歲時  
所甘心蓋必逢其人焉逢其人吾既能虛心而請之又必當強

力以事之心不虛則縱言不入吾耳力不強則勤怠作輟矣是  
則吾遊之羨也苟非出乎此惟事乎登臨之美觀覽之廣交遊  
之多賦詠之工是謂外遊祇畫自累而已矣上人曰然於是乎書

恒菴銘序

曹鐸林振居于上饒龍廟之麓前臨溪流予嘗維舟溪上甚清  
炯可愛也林振秀而端凝家無餘資而最嗜學隣一室日讀書  
其間而自扁曰恒菴菴易李存嘉之為之銘曰

厥生之初其誰不恒七竅既鑿群邪以萌德豈二三或乃千  
百偶遇一者執而為賊吾恒匪石義有轉也吾恒如席可舒  
卷也吾固承羞求汲益函得其所恒收恒之功曹子麟室而  
扁以此無冬無夏左圖右史高波覆舟勁風退飛有始有卒  
君子之為

贈何伯度序

至正己丑

上饒何伯度嘗携書過余竹莊之上余適有宗家疾病扶持之事不能與切磋今忽復來溪知其用志于學者頌吾老而無所成不足以益伯度然吾聞季有古今為己者古也為人者今也為己即為人為人或不復為己矣今國家以科舉取士吾子先脩其行見信於朋友見稱於州閭鄉黨明聖人之經使積於內者先自充然則發於外者後必燁然如是而學則古今之道備矣

贈何環玉詩并序

臨川何環玉者嘗遊浙江之上得醫術以歸試之良驗其祖大抵張長沙前輩云仲景之治傷寒其聖矣乎其論汗吐下之法有止發汗者有和解之者有足脈不至而未可汗者其審不輕汗蓋如此則吐下亦然恐後世人用此三法未能消息其詳而且精者余每疑之醫者人之司命今環玉有師傳更能盡其惻隱日人於高明而無所失也必矣因贈一詩

吾難老縫掖每喜論醫事元：山中居榮：無所試何君方  
壯年得法自淞水家居師峯下隴畝多壤地首：杏成林百  
年有餘美

徑上人詩卷序

邑之東北為廬山其陵麓深邃原隰衍沃余大父：皆葬焉山之既為僧寺宋侍郎湯公季容尚書湯公伯紀嘗築室於焉而扁曰迴菴暮年每來居之有老僧問為余言曰二公當菴中時並無長物唯一奴危坐清談或終日或分夜二湯公當時名紳也晚乃樂處乎此非其境之勝則其僧之有足語者歟今徑上人年甚少好讀書余歲時省墓必從游殘山剩水間屬啟而後別余亦欲從渠借半室下一榻庶幾乎如二公從容者顧余何人不齒於鄉里不登於仕版非有博聞備述之名而自遊非有泣官為政之勞而自休亦何敢影響彼君子哉但窮溪即坐

玩清泉蔭嘉樹求所以自湔自拔者則雖古聖賢未必不吾與也而上人忽一日來謂將杖錫以遊邑大夫士咸賦詩以相與累數十篇且徵予序余曰吾方欲入山而上人乃欲出山何也因相與一笑而書諸端云

贈慶上人遊廬山序

至正丙戌五月甲子作

廬山之勝甲東南其間仙佛之舍無慮數百吾嘗欲一遊或一年或二三年小大將無不歷昔賢之所未及吾更及之所未詩文吾更詩文之其好事未必不能飯我宿我也然壯時則親老親沒則婚嫁男女婚嫁甫畢而已自老且病矣每念之若有速負然今慶上人將以明年春杖錫而行上人無父母妻子之累而春秋方盛窮高涉遠皆易也白雲吐吞瀑泉怒流且緩歸遍歷更求先達者而奉扣之心目之所得吾他日一一叩焉是則吾遊而已矣

半峯閣詩卷序

至正己丑九月甲子

羅首山在臨川境上而適當安仁縣治之前平曠百里之外卓然如筆者三闕其下為僧寺長原深塢清泉老木良田深池可居可遊者甚多也嘗欲一遊而未能時雨之霽青在窻牖間雖老矣終不忘於一遊他日盛上人携詩一卷來謂予寺之東偏構一閣面其山雖相去不六七里而朝煙暮雲恒見其半故自扁曰半峯縉紳先生名勝之士皆賦詩焉余取而讀之咸佳作也令人卷舒不釋手閣中之趣不覺盡在吾心目中可謂無杖屨之勞而有登覽之樂平生欲遊之興庶几其酬乎然吾又聞山中之人多好事餘飯足以及客顧老脚尚健盛公未宜以此卷止吾來也因相視一笑而書于卷端云

番禺仲公李先先生文集卷之二十一

傳說銘

徐氏郭婦傳

信之貴溪縣下塘里徐紹仲妻宋氏年二十有九而紹仲卒有子三人長震九歲次秩六歲次石二歲既三年親戚戒風之他適宋涕泣曰吾年雖幼姑且老吾豈敢有他也乎由是事姑如謹子且長則擇師教之今皆振然有可見而士君子願友者矣咸謂天之所以報於有禮其若是昭乎或又謂此蓋人之常分然則柏舟何以有詩且凱風雖七子而猶不能安其室孰謂世父衰俗父下而可以厚誣也是故國有旌典所以勸也願階里之譽美其獨可以已也乎宋名其字守鄉云

牧鳧郎傳

牧鳧郎者蓋不知其何姓名曰牧鳧於東坡之上有過而問焉

者曰牧鳧賤事也而子獨奚樂哉牧鳧即啞然笑曰子尚足與語牧鳧之事之樂乎哉吾目為惟吾鳧見也吾耳為惟吾鳧聽也吾竿為惟吾鳧朝也吾杓為惟吾鳧莫也亦不知吾之牧鳧鳧之牧吾也而子謂我奚樂哉遂長歌而去歌曰

牧鳧于渚鳧翼濟朝之莫之曷不我與牧鳧于澤鳧音格格莫之朝之曷不我得淵乎斯我之求乎愉乎不知歲之道乎

慎獨齋銘

獨者何我是己日之中水之止焉用慎乃糠粃世久降偽妄起喻如家還道方里死不歸亦可耻哲人言闕瞶昧策雖在信者幾局乃堂洞厥旨慎無慎斯足美

胡子泉字說

臨川道士胡原從其郡人危太朴游而太朴字之以子泉余曰

溪哉廣乎危子之字子也夫泉孕於山谷蟄於土石而表不主隱發乎實經乎溝而世不病其汚滄乎其若稚涌乎其若狂遇坎而洄得洄而傳并之若拘而不怨瀑之若顛而不驚濺之而為珠璣噴之而為霧雨不舍晝夜而不辭其勞潤及萬物而不居其功臨之以臺榭來游來觀而未始有所喜也散之以穢惡以滋以溉而未始有所怒也蹄泔也禽獸飲之而弗辱濤瀾也魚龍舞之而弗榮不自有其明也而鑑別妍醜無或少或不自我多其能也而滌濯塵垢無有弗潔滔乎為河為江而不見其肆也涵乎為湖為海而自不知其止也是故泉者水之微也水者泉之著也故曰探理之機先觀其微得理之裕方玩其著雖然泉之變多矣而性則本於無為泉之用大矣而德則在于不已惟其無為是以不已宜乎孟氏之言曰有本者如是故善觀於泉者必其有得於本者乎不然則泉自泉而人自人也

雖有其字夫何與之有

清寧齋銘

分而言之清寧却在天地合而言之清寧只是自己子苟不信有如溪水

倪文寶正心銘序

上清倪生文寶居于龍虎山之麓業于筆三世矣臨川東白鄧先生扁其肆曰正心蓋有取於唐柳公權以筆諫其君者也番易李其銘曰

柳公之諫也善書之道鄧君之扁也製筆之理製筆而不正其心不員不健善書而不正其心必偏必倚必倚者字不逮於古不員不健者筆為人所棄其事雖殊其理不二宜夫古之人因斲輪而嘆讀書因解牛而知夫養生之旨也

克己齋銘

金谿劉君名有字君良以克己扁其齋其無乃有志于為己者乎李其為之銘曰

己本無物何所於克朴散習移有蝨有蟻千一其枝夙夜厥思曰善曰靈胡乃棄而生知蓋寡理有先覺致其求與飢與渴若稂苗之耘塵鑑之洗雖則云克猶於己八荒六虛安所底乎有力弗及斯顏之徒

止止寮說

徑上人好讀書他日過之開軒而席臨流而茶因取莊生吉祥止之之言而扁之曰止止寮上人請發其義余曰天也地也一日而百千萬年天地止也日月也寒暑也亦一日而百千萬年日月寒暑止也山之止精氣聚焉水之止為湖海為雲止則兩風止則霽也故曰為不止死骨筋人不止死其神夫懂而朝逐而晝又擾而夜雜寐或駭而汗或噉而悟或笑或泣或

展轉而捷不交雜死也或不合而視或附物而效無他是皆不  
止之故也然則果何由金珠可以蒙我也穀粟可以肥我也其  
鮮宜我口也輕暖便我體也其不止也固宜曰若子之言衣草  
乎食木乎土處乎無所事于其上無所役于其下乎曰非兀  
以朝夕也非束、不少之庭也用於日吾有分也終于身吾有  
分也固于分則止越于分則不止子果能止乎止于彼不止于  
此非止也止于少不止于老非止也止而又止真止矣雖然  
無乃與取字之義不得相牽引乎曰徑者直也止則直不止則  
不直吾子釋之徒也去髮而方服離親戚而就師友苟不止將  
何為

素籥子說至正庚寅夏五月二十五日作

龍虎山中道士祝洞天臺笠而芒屨背有負囊手有植杖過  
余而言曰吾以素籥子自號蓋取諸老子天地間猶素籥之

言因謂氣生於虛素籥者鼓之而有歛天地之間吹萬而生吹  
萬而死古、今、無窮期也然人當疑不知有鼓之者與 其  
評辯於天地之後孰若忘言于天地之先其果猶素籥歛其果  
非素籥歛今吾子行諸洞天雷書可以時雨暘可以禁劾鬼物  
之為民物害者其用心亦勤矣老子云天法道、法自然

清修齋銘至正丁亥二月乙卯為臨川高植作

老子有言五色令人目盲五味令人口爽五音令人耳聾不如  
清脩君子食而知其味視斯明而聽斯聰然則何以謂之清又  
若何而修曰無欲為之宗是故聖賢者無所不知無所不通而  
形則與槁木心則與死灰同也

居敬齋銘

我本敬何庸居客他鄉欲所驅苟知非問歸途日日行勿斯須  
久則安暇立夫視吾齋高不虛果能然孔之徒

吳氏子蘭字說

吳君才甫冠其仲子蘭賓余而請字之且曰斯子也生六日而母亡聞古之人有丁蘭也者早失母象而養之加於生蘭其如蘭乎故名余曰懿哉君之名子也我則亦有斯隱也請字之以思苟思之思在象不象也象以外思以內也詩曰永言孝思孝思維則使尔而思也則尔母不死也矣使尔不思也則尔母死也矣思之為美大矣哉然則思之將若之何曰報之報之將若之何曰受而全之敬而歸之而已耳是故物之戾乎人情也者孝子弗為也嗚乎江河可遷塞也金石可銷毀也吾與尔之生之思之隱有不可窮焉矣也遂垂涕而書之

怕齋銘

怕之為德古亦罕見南人有言洙泗所善毛子孺者而游於醫以是病齋其心可知二二之徒願我先病實虛生生死誰柄

得失窮通不變不遷雖已尔疾亦全吾夫母徒其名母但厥始尊而終之是則尔智

守玄齋銘

高城深池固乃社稷重高壯鑄保乃金壁玄果何物而尔守之守之若何為抱為持老氏有言上德不德惠彼小鮮以治大國無言之玄無守之守青山白雲孰匪我有

曾觀過字說

臨川子曾子之字曰觀過其君子矣乎然則過若何而觀懂乎其往來紛乎其酬酢吾恐不能觀也必也收其放操而存如水之止如鏡之明而後萬象莫之能逃然則過有小大有精粗雜聖賢不能無改之而已矣字而弗觀是謂徒字觀而弗改是謂徒觀

說學齋銘

臨川危太朴游京師承旨朵兒只班公築室以客之學士清江揭公扁之曰說學齋他日以書來命記於書易李其碩卑鄙且哀老意其任昔危子之行也微言者一再卒無以為贈甚自愧今不欲復姑其意敬綴數語以寄勉之其辭曰

匪生知必由學務真實為表襮孔子好顏氏卓哲之詠與也約俯仰間無愧怍果能然胡不樂

### 陳彥清兄弟名字說

上饒陳先生之孫三人長穎彥清次東彥方幼辰彥良他日穎將遠游請發明其義余曰穎天下之水之至清者古今人稱為清穎云故字以清東者方之首而萬生之始也于時為春於人為仁故字以方辰者日月之所會大而國家細而階屢凡有所事孰不擇其辰之良故字以良雖然兄弟之身一人之身也天下之理一本而非二是以君子之能修其身者在于清明其心

焉耳勿擾：以自賦勿懂：其失則故曰清明在躬志氣如神是則所謂仁也苟仁則吾之變化云為無所往而不善矣吾見名聞其字則三推其義則一也矧彥清粹美而嗜學彥方敦厚而有容而彥良於日用之間亦知所自擇皆得不孤其名字云

### 復心齋銘

日用歷：何欠何修而欲復之無乃贅疣喻如家乘父母所異吾縱吾情既窶且圯豈不夙夜面目覩然折節改行庶存故託子黃其冠厥尚清靜伯陽亦言歸根復命此扁固美斯銘豈誣弗苟弗忝通家之徒

### 詠沂齋銘

曾氏詠沂齋余既為賦一絕他日子居復來請銘因以自勵云自昔無聊甚辨而不獲銘曰

雲林之山拔地干霄爰有曾氏築室翹：室中

昔者一貫今而三餘毋徒青黃毋但口耳何聖何賢萬古一軌  
松風蕭々竹月疎々孰謂先尔孰謂後吾出金石聲無忝厥祖  
迹非沂上聖哲同典

鍾均字說

餘于鍾均字伯成夫陶鈞萬物而無不成者造物也若亦知其  
理乎曰無為而 不為然則既以名字吾吾果與造物異乎曰  
無以異也成已仁也成物知也合仁與知君子之事畢矣

蔡氏子字說

餘于蔡氏之子冲字敬止余曰君子之於為己也敬則止不敬  
則不止吾位夫天地之視其形則二求其理則一敬不敬乎是  
故儼然而非思榮然而非為孝子忠臣由此而出也苟懂乎  
往來擾々乎旦夕是謂不敬是謂不止是謂舍君子小人之歸  
敬即止：即敬非敬自敬而止自止也

俞道士天字說

俞子學道龍虎山中而客字之曰天字他日求其說于李子于李  
子笑曰眇乎我哉而字若是不以荒乎俞子胡不乘飛雲而遊  
觀乎八極之表而向以人之說為然則天地雖大也要亦出于  
道耳今吾與子亦皆遊乎道而人焉是必皆有先於天地者矣  
吾方與子庶或見之如是而字何驚何疑而人亦以何說之  
故曰天地非大也螻蟻非細也一於道而已矣

中說贈留孟中

荇粟布帛在天下飢者無不資其飽寒者無不需其溫百耳喙  
群尔古極當世才辨豈有易于聖哲之言哉况夫盈天地間形  
色声氣觸目接耳者皆中也汝獨弗思乎歛而靜變而紛紜發  
而千萬里潛而陰陽古今頽此一孟中其倏霍不齊若是果孰  
使之然與今通呼女曰孟中女拱而前曰唯唯呼以他則不謬

或蹄之翼之異類之則必佛焉怒曰我人也奚彼之賤然則是  
以形軀為孟中也超乎形軀者蓋真孟中觀面無覩也入耳無  
聞也孟中非遠而外在己耳執己以求已斯愈失矣中乎中乎  
他日當徵吾言平生起謝曰敢不敬承遂書以為中說

劉孟中字說

臨川劉禮字孟中來求其說余曰子無徒求中之說當求識天  
中之實焉可也然則若何而識之一曰有信心二曰立定志三  
曰擇正師今夫衆人之欲貴己者孰不謂爵祿京師之所自出  
也必宜於京師焉求之是信也聚糧而索殮忘舟車水陸之勞  
易寒暑而不輟犯霜露而不懼忍羈旅而不憂是志也求先事  
於己者請其干取之方辨其得失之機是則師也是故由其心  
之信而後志之立由其志之立而後師之擇是三者缺一焉不  
可也是則求夫中者之實者也非徒取其稱美焉而已也非徒

資夫滕口佔畢也記曰心誠求之雖不中不遠矣

習齋銘為鄧子方作

理本然焉用習火就燥水流濕首途非百妄集知之人斯及  
忘飢渴耳若澁忽而明捷莫及風清之月澆之怕若茲稱允執  
執非執天地立

格齋銘為劉道士作

格者何格自己物雖萬寔一理先覺遠說逢起外而求實糠粃  
果格之自靜止良其背視己耳苟無情當有喜吾非吾天地已  
中說贈黃中子

中者何聖人假言以明道也道而曰中何欲人求諸己而不差  
也夫自伊祁氏發之宣尼父申之而子思氏達之三尺童子能  
誦繹矣然要其實蓋有談中而不識中者之中也之人所自有  
也惠弗思耳焉有不識者執括氣血膠意見森淫於邪說雜學

之府蛆腐于聲色貨利之場清明蝕而私辟興乃欲望其識中  
難矣吁江黃生一洒習俗之陋有志于古命名曰中復以中子  
字誠知求其本矣天地此中也萬物此中也賢知非餘也愚鄙  
非嗇也非高且遠也非鏗于外也由我而已視聽食息動靜云  
為於是乎時中亡彼已無小大無夷險無貴賤無生死子苟思  
而識之何莫而非中也

萬木山房銘

余于丘生其構數椽於深山之中日讀書為其師揚君顯民  
扁之曰萬木山房且為記以勉之他日復求銘于余諺云山  
中有直木世上無直人若然則是人乃有愧于木蓋因木而  
有所警乎欣然為之銘曰

木以萬計幾曲幾直我居其間相見朝夕從其曲邪曰喪厥德  
因乃直者是則是式日用之間不索而獲變化云為天青日白

既無經營豈有反側聖賢何人初不間隔惟女萬木寔吾三益

畫龍說

龍馬山道士周愚蘊古善畫龍來求說於余：曰予非善畫龍  
者若何說之求吾聞龍乃天地間至靈變物也大而飛雲漢橫  
江海細而為微塵入罅隙怒而拔山破石遷陵變谷柔而蟠泥  
沙雜蝦蟹子能畫其常果能畫其變乎又聞龍之所以為龍者  
以神不以形：有：無神無有無子能畫其形果能畫其神乎  
蘊古咲而不答然則子之畫果安在曰在筆意余曰吾論畫在  
神氣萬物皆然况龍乎故曰凝吾之神以寫其神形神備者上  
也形而不神下矣雖盈尺之素望而威如薄而凜如颯而益浩  
浩如不然殆畫工耳兒童耳蘊古大咲長揖而謝曰子又吾畫  
龍師也

危則方字說 至正己丑閏  
七月丙戌作

臨川危矩字則方求說其字之義余曰矩者所以為方也匠者  
敬方其器必矩之用此衆說之所同然其形而方莫若於地吾  
不知其初誰實矩之故曰道有化機非為之為今則方名家之  
子有為學之志其行己其績文要亦歸於自然而已矣

希古說至正乙酉  
八月日作

天地日月山川草木無古今也人獨有古今乎使生往時放辟  
邪侈可謂古人乎生在後世脩身踐行亦可謂非古人乎故曰  
惟其人不惟其時隨風水而飄泊者萍蓬也歷霜雪而不枯者  
松柏也鄙人滿齋賢以希古自號其亦不沒於俗下者予聞  
而樂之且書以勉之

### 同齋說

余于王其扁其讀書之所曰同齋蓋取車同軌書同文之義也  
求是說於予蓋同與異對天下之事有似同而異者有似異而

同者吾與若皆人也百智愚賢否之不同此似同而異者天地  
自天地萬物自萬物人自人我自我造其理則一此似異而同者  
王其先察乎似同而異後造乎似異而同則信夫天下車同軌  
書同文矣

### 德義堂銘

德義堂者江陰州澄江書院講會之堂也書院蓋州人蔡君某  
所建謂其先宗闈人西山先生季通及其子仲默皆師友考亭  
朱夫子者而嘗講學於此故祠事之經曰陳之以德義而民興  
行因以為扁番易李其階而喜曰夫德也者人之得於天者也  
義也者行而宜之者也蓋未有得於天而行之不宜者亦未有  
行之宜而非得之於天者名雖二而實則一也是故君子之於  
學也在於知德知德則知義矣苟不知德義之則亦將安所履  
踐哉今蔡君既能開創於前而若子若孫又能繼述于後其州

人子弟講肄於是而有所興發也者必多矣為之銘曰  
天之所予有不自覺苟非生知必由於學其學伊何反察內  
觀視聽言動忽見其端其端伊何粟火線泉順而長之赴海  
燎原日用在茲曰德曰義前言往行何者非是繫尔蔡君企  
景先哲不私乃力為此構結朝莫降昇濟：陰：因名有實  
邦家之光

番易仲公李先生文集卷之二十一

番易仲公李先生文集卷之二十二

說銘

李伯尚字說

臨川李綱字伯尚來從余游他日請說其所以名字者余曰衛  
風碩人之詩曰衣錦紈衣中庸曰衣錦尚紈惡其文之著也夫  
君子之于學先本而後末先內而後外有其本而末自理有其  
內而外自彰是故豈有毫髮求知於人之心是謂實學是謂行  
成人與之俱若無能者故貴乎尚紈以自保自任也今吾子考  
友先於家庭恭敬達於鄉里趣向乎於師友所謂錦也果能然  
勿自多勿謂已君子而人小人人毀我益自檢人譽我者可愧  
聰明若愚良賈若虛是則紈也夫內外本末備以成其身者是  
則衣錦尚紈之象也

居善堂說

至正己丑九月乙丑注

臨川黃文中僑居于上饒龍山麓有年矣而自扁其堂曰  
居善蓋取於易繫辭君子居其室出其言善則千里之外應  
之：美也夫繫辭大抵發明中孚九二言行感應之理然成徒  
知夫有感必應而未知夫所以有感必應者一於至誠而已夫  
至誠之感應豈特限以千里雖際天極地往古來今莫不皆然  
又豈特人為然鶴鳴而子和者天地之大鬼神之幽萬物之散  
殊亦莫不皆然故君子之學在於修身修身在於至誠發弘太  
之心立堅剛之志遷善而改過求去其日用之非至誠者而復  
其本有之至誠者而已矣

晚香堂銘

臨川太守洛陽楊公致政作堂於後圃而扁曰晚香蓋有取於  
宋韓魏公詩語意也初公從事江西憲府時先封文判州府君  
常命其子天麟從公讀律已飽聞其判介不私甚慕之既屢見

其法書庶稜勁健真如其人雖不識猶識也友人吳謙嘗拜公  
羊角峯下他日將往候公且來命銘其堂願維鄙賤欣然為之  
辭曰

秋風淒々白露未霜萬木之穉已墮其黃有繁者菊既華而  
香賢哲之人好以壺觴詠之歌之載清載長繫此楊公宿秉  
貞剛潤視貴富擲其郛章築室以燕西山之陽為此佳名揭  
諸棟梁乞書問字客車彭：公咲而出縞衣玄裳想其執筆  
如握干將飛星迅電歛出鋒鏃題遁避神明降張維則致  
政措紳之網蒲輪之來遲莫弥光有子繼仕有孫在奇英  
滿籬以翔以翔爰食其落眉壽無疆

程章宗美名字說

至正乙酉十月二月丙寅作

豫章程章字宗美蓋取坤卦六二爻辭含章而文言謂陰雖有  
美含之以從王事弗敢成也坤之美以其卑且順也入則為人

之子出則為人之臣皆當含晦其章美故子有其善歸之於親臣有其善歸之於君况六三居下體之上以臣而論非小遠也以子而論非支庶也子而自有其善則疑於親臣而自有其善則疑於君不美之大者也名字而以此其必能為人子為人臣也乎宗美勉之

正思齋

上饒夏衍柏承聰敏而厚和自扁其讀書之室曰正思李其為之銘曰

為學之方思欲其正其正伊何善者吾性善有形似未易窮竟良醫不逢愈藥愈病孟氏巧譬由於至聖苗而不耘以摠為盛吾生益後胡覩胡聽不求先覺千里而暗非思之思無敢弗敬孰為影響焉取蹊徑不波之水未垢之鏡子信斯言庶或有證

汪氏二子字說

新安汪君季章名其長子曰翬而以字羽次子曰常而以字昭蜀郡虞先生既為之說季章以其皆嘗從游於予也請復申之余曰翬之羽取其文者固也然禽之文者衆矣何獨取於是曰五彩備也然則備五采亦其巧所為与曰自然也是故文之貴於自然者尚矣至飾辭以為工又謂之文吾不謂之文也常者何常也子而孝常也臣而忠常也目不失其常而昭之亦常也事雖至於周公閔子皆常也善於其親以自德盡瘁於君以為勞則失其所以為常者矣由是觀之常則自然則常吾又知季章之所以命其子或相用而不相背也不其深且美乎二子勉之

義訓堂銘

義訓堂者龍虎山中薛君茂弘作於其故家者也初君八世祖

司都校尉公嘗作堂曰義訓以教厥子孫歲久廢十四世祖縣丞公重作之更代則又廢及是君復構焉而扁曰義訓蜀郡虞先生記之而番易李存為之銘曰

義出於天胡可以訓生而由之是曰大順學絕習移失吾厥常載途棘荆其行長父師之賢爰啓爰迪歲修有所塞者日隴陵谷變遷事或中廢培溪積厚宜此繼志子黃其冠而乃肯構既成雲來亦厚祖考有白其牖有碩其楹無春無秋誦弦之聲惟老與儒世外世間尊親爾天獨還風雨震凌尚克有守斯言雖近足相永久

### 天定堂銘

天定堂者臨川濠原王伯達之所作也其一世文正公之先有二槐堂眉山蘇子銘之其間有取于申包胥天定勝人定勝天之言伯達以己為文正之裔自慕續其風節復采其言以銘

堂而番易李存為之銘曰

積氣蒼蒼為象莫大眇乎其人太倉之芥醜物比類何啻萬千一理傳形實則同然人而弗人有不自見遐瞻遠仰神傾目眩曰定曰勝夫何惚茫申生之言奇而未詳濠原有堂取以自扁求承祖武豈但濡染智者之為獨觀吾天吾苟定而天實在焉不定之定是謂天應似定而非天則甚病曹氏槐陰清長姑為此銘尚登其堂

### 愛敬堂說

至元丁丑書

張君明翁名其奉親之堂曰愛敬他日求言於余曰愛而弗敬是褻之也敬而弗愛是憚之也執褻之則不親不尊非孝也不親亦非孝也今君盡二義以事親其不謂之能子也乎

### 胡伯廣名字說

至正丁亥九月日作

臨川胡及字伯廣蓋有取於詩小序漢廣篇德廣所及之美也  
大學曰德潤身中庸曰非自成己而已也必先自明其明德  
將推以明夫人也及也者豫期其可及也廣也者周普而不狹  
也此先聖賢遺言而望於天下後世者如此及也毋自輕毋自  
疑毋自畫

吳簡文字說

臨川吳玟字簡文請為之說余曰簡而文蓋中庸篇中語也所  
以形容君子之道不簡則支不文則鄙然一於簡則傲一則賈  
怨一於文則華一則不實賈怨身之殃也不實德之戕也今簡  
而又文則其在己者約而不野其應物也有禮而不煩義相為  
用而不相悖也度幾中庸之君子矣乎夫如是可以立身可以  
保家近可以事親遠可以事君千古進脩之士蓋有不異轍者  
矣

精勤齋說 為文氏作

一而不雜謂之精為而不已謂之勤不精無以復其本不勤無  
以致其力精而不勤則雜物踵至勤而不精則徒苦而弗成是  
二者相須而不能以相無君子之為君子舍是何以哉

用晦齋銘 為張明翁作

宜晦而晦向事於用或傷其明靜不可動張子醫者扁齋何為  
治有變通必造其微癡之愚之保乃冲粹祭二十日則麗則鄙  
火雲赤日吾見其陰冰雪泣寒厥陽益深如是而醫造造化理  
天闡大行正此生死



*[Faint, illegible handwritten text, likely bleed-through from the reverse side of the page.]*

